

Ĕkwo-ozì, Pọ̀lu Deru Nụ Ndu Romu

1 ¹Ĕkwo-ozì ọ̀wa-a shì l'ẹ̀ka mụ̀bẹ̀ Pọ̀lu; onye ejeru Jizọ̀sụ̀ Kéreshì ozi; bụ̀ru onye Chileke kuru gẹ̀ mu bụ̀ru onye-ishi-ozì onọ; bya abụ̀ru onye Chileke họtaru gẹ̀ mu bya ezia ozi-ọ̀ma iya onọ.

²Ozi-ọ̀ma onọ bụ̀ iphe, Chileke shihawaa l'ọ̀nu ndu mpfuchiru nkiya kwehawaa ukwe iya teke dūhakpowaro ẹ̀nya ẹ̀nya; tẹ̀me a byakwaphọ̀ edehawa iya l'ẹ̀kwo-opfu Chileke. ³Ozi-ọ̀ma onọ bụ̀ kẹ̀ Nwa iya, bụ̀ iya bụ̀ Nnajiuphu anyi Jizọ̀sụ̀ Kéreshì. A -bya l'abụ̀bu, ọ̀ bụ̀ nemadzụ̀ bụ̀ l'a nwụ̀ru iya ọ̀ bụ̀ru Nwa Dévidi. ⁴Chileke shì l'ike onọ, meru iya ọ̀ bụ̀ru onye dū nsọ̀ onọ; mee ya o shì l'ọ̀nwu teta dzụ̀ru ndzụ̀ egoshi l'ọ̀ bụ̀ Nwa iya. ⁵Ọ̀ bụ̀ iya bẹ̀ Chileke gbẹ̀ l'ẹ̀ka iya meeru mu eze-iphe-ọ̀ma onọ, bụ̀ kẹ̀ gẹ̀ mu bụ̀ru onye-ishi-ozì duru ọ̀ha, shikpọ̀ọ̀ ẹ̀kameka lẹ̀ mgboko mgburugburu duba l'ụ̀zo, ẹ̀phe e-shi kweta; meje iphe, e deru l'ẹ̀kwo-opfu Chileke g'ee-shi nno kutsee ẹ̀pha Kéreshì onọ. ⁶Gẹ̀ mu edu ndiphe l'ophu onọ bẹ̀ unubẹ̀ ndu Romu yìchakwaa ya; mbụ̀ unubẹ̀ ndu Chileke kuru g'unu bụ̀ru kẹ̀ Jizọ̀sụ̀ Kéreshì.

⁷Ọ̀o ya bụ̀ lẹ̀ mu ede ẹ̀kwo-a anụ̀ unu g'unu hakọ̀ta lẹ̀ Romu; mbụ̀ unubẹ̀ ndu Chileke yeru obu bya ekua unu; g'unu bụ̀ru ndu-nsọ̀. Gẹ̀ Chileke, bụ̀ Nna anyi yẹ̀ Nnajiuphu onọ, bụ̀ Jizọ̀sụ̀ Kéreshì meeru unu eze-iphe-ọ̀ma; mekwaaphọ̀ g'ẹ̀hu dū unu guu.

Pọ̀lu epfu k'ẹ̀je Romu

⁸Iphe mbụ̀ kpọ̀ada bụ̀ lẹ̀ mu gbẹ̀ Jizọ̀sụ̀ Kéreshì l'ẹ̀ka ekeleru unu Chileke g'unu ha; kẹ̀le e pfudzuwaru k'ekwekwe, unu kweru kẹ̀ Chileke l'eliphe mgburugburu. ⁹L'ọ̀ kwa Chileke bụ̀ onye ekebe mu l'anọ̀duje epfuru iya opfu ẹ̀hu unu eswe l'ẹ̀nyashi mẹ̀ mu -nọ̀du epfu anụ̀ iya. Ọ̀o Chileke onọ bẹ̀ mu gude obu mu g'ọ̀ ha ejeru ozi k'ezì ozi-ọ̀ma kẹ̀ Nwa iya onọ, bụ̀ Jizọ̀sụ̀. ¹⁰Mu anọ̀duje epfu anụ̀ iya sụ̀ g'ọ̀ gude obu ọ̀maa ya mee gẹ̀ mu kabẹ̀ kpata ụ̀zo bya agbaphee unu. ¹¹L'ọ̀ogukpo mu agụ̀gu gẹ̀ mu l'unu hụ̀ma; k'ọ̀phu mu e-me g'iphe-ọ̀ma, shì Unme-dụ̀-Nsọ̀ l'ẹ̀ka rwube unu

ẹka. L'eshi ẹgube ono mee g'obu shihu unu ike. ¹²Mbù lẹ-a; iphe, mu epfu bù l'ekweta, unu kwetarù e-me g'obu shihu mu ike; ekweta nkemu emekwaaphò g'obu shihu unu ike. Ọo ya bù; anyi eshi nno yeru nwibe anyi ẹka.

¹³Iphe, unu a-maru; unwunna mu; bù lẹ tekenteke bẹ mu asuje lẹ mu abyawaa unu agbaphe; ọle eshikpọo teke ono bya asù nta-a bẹ o nwe-rupho iphe, akpòshije mu abyabya. Mu atùbeje lẹ mu a-bya gẹ mu aharu ndu ndu-unu pfuta yeru Kéreshi gẹ mu epfukwa iya phò l'ohamoha ọzo, abùkwapho ndu Jiu. ¹⁴Lẹ mu jikwa onyemonye ụgwo ezi ozi-oma ono. Mu ji iya ndu Gurisu bya ejiru iya ndu abùdu ndu Gurisu. Mu ji iya ndu gùrù ẹkwò; bya ejiru iya ndu agùduru ẹkwò. ¹⁵Noo g'o gude ọ nọdu agù mu ẹgu abya ezi unubẹ ndu nọ lẹ Romu ozi-oma onokwaphò.

Ike ọphu Chileke gude adzọ ndiphe

¹⁶L'iphere ezi ozi-oma kẹ Kéreshi ono ta adùkwa mu. Kẹle ọ kwa iya bù ike, Chileke gude adzọ iphe, búpoo ndu kwetarù kẹ Kéreshi. O gude iya vuru ụzo adzọ ndu Jiu; ndu ta abùdu ndu Jiu nọdu etso phẹ. ¹⁷Lọ kwa ozi-oma ono bẹ Chileke gude egoshi apfùbekoto nkiya, bù iya bù ekweta nkiya, shita l'ishi jasù l'ikpetemazù; bù iya bù g'e deru iya l'ẹkwò-opfu Chileke su: “Onye pfùberekoto e-gude ekweta nọdu ndzù.”

Ikpe, nmarù ndiphe l'ophu

¹⁸Ọ búrù iya meru g'o gude Chileke shiwaa l'imigwe goshi gẹ ya e-gude oke-ẹhu-eghu iya mee ndiphe; mbù oke-ẹhu-eghu, l'eghu iya nù lẹ ndiphe kpọru iya ẹbo l'afù; tẹme ẹphe nọdu eme ejo ememe. Ẹphe gude ejo ememe, ẹphe eme akpaya ọkpobe-opfu ono ishi. ¹⁹Iphe, gbaru nemadzù g'o gogo maru iya lẹ kẹ Chileke bẹ dabyiru ẹba l'iphu iya; kẹle Chileke goshiru phẹ iya lonwiya. ²⁰Eshikpọo teke Chileke meru mgboko bẹ nemadzù shiwaa l'iphe, Chileke meshiru maru ẹgube onye ọ bù ọkpobe amaru. Like iya, nyiberu anyibe a-nọ ojejoje; tẹme ọ búrù iya gẹdegede bù Chileke. Ọo ya bù l'ẹphe ta agofuedu. ²¹Lẹ nemadzù machachaarù lẹ Chileke dù; ọphu ẹphe akwabejedu iya ùbvù l'ọ bù Chileke; ọphu ẹphe ekelejedu iya ekele. Ọ chia iphe, meru nù bù l'egomunggo sweshihùwaru phẹ; k'ọphu ọriri phẹ bụwaa iphe-mmanù; ọ bụwaru eme eswe jiru phẹ obu; k'ọphu obu phẹ gbahùwaru tsùkiribaa. ²²Ẹphe gude l'ẹphe sùru l'ẹphe maru iphe; kabakpọoro abùru ndu eswe. ²³Ẹphe woru ùbvù, e gege akwabe Chileke ono, a-nọ je adùwaruro adùru ono ye l'azù bya abaaharù ntẹkpe ẹja; ntẹkpe, e megbaaru ọ dù gẹ nemadzù, ta adùdu ẹka ọo-nọ-beru; ọzoo g'enu, ẹphe l'eli; ọzoo g'anù; ọzoo g'agwọ.

²⁴Noo g'o gude Chileke parù phẹ haa; ẹphe melahaa ejo ememe, bù iphe, agù obu phẹ. Ẹphe wata eme onwophe nọ ememe. ²⁵Nemadzù woru iphe, bù ọkpobe-opfu kẹ Chileke ye l'azù; kweta iphe, bù ụka; bya

awata abaru iphe, Chileke meru ememe eja; akwabẹ iya ùbvù; haa Chileke ono, meshiru iya nù ono; bụ onye ọ gbarụ kẹ g'anyi tuje ẹpha jasụ lẹ tuutuutu lẹ m̄imiimii. Nokwa g'ọ dụ.

²⁶Ọ bụru iphe ono meru g'o gude Chileke parụ nemadzụ haa; ẹphe wata aji momomo; eme iphe dụ ideyideyi. Kẹ g'unwanyi pẹ hajẹ ejepfu unwoke, bụ iphe, Chileke medoru pẹ; wata ejepfu unwanyi ibe pẹ. ²⁷Nokwaphọ g'unwoke pẹ haru ejepfu unwanyi, bụ iphe, gbaru pẹ nù; ẹgu ejepfu unwoke ibe pẹ nọdu anọduje enwu pẹ phuruphuru g'ọku l'ẹhu. Nwoke yẹ nwoke ibe iya wata akwakwa. Ẹphe watanu ahuma urwu, gbaru ọriri, sweshihuru pẹ nù l'ẹhu pẹ.

²⁸Su-a; eshinu ndiphe te ekwedu amaru iphe, bụ ọkpobe-opfu lẹ kẹ Chileke; Chileke parụ pẹ haa; ẹphe nọdu arije ọriri, enwedu ishi; watanu eme iphe, agbaduru pẹ nù. ²⁹Ọphu ọ dudu ẹgube ẹjo ememe; mẹ iphe, apfuduru-oto, ẹphe te emedu; k'ọphu oobushi pẹ ebushi l'ẹhu. Ẹphe nọdu aji momomo g'ẹphe naa iphe, abudu nkepẹ; edoberu nwibe pẹ ọkpoma mgbashi. Ẹnya pfurupfuru paa pẹ ẹka l'ẹhu; ẹphe nọdu egbu ọchi; esephe opfu opfu bya agho-phe ugho; ẹphe nọdu eme iphe-ashi; bya asu-phe asulasu. ³⁰Ẹphe nọdu evu nwibe pẹ nvu azu; bụru ndu Chileke dū ashi; ndu anọduje eme nwibe pẹ iphe-iphere l'obu ọku; bụru ndu eme ngganga bya etse etsetse. Ọ burerupho g'ẹphe e-me mee ẹjo-iphẹ bẹ ẹphe anọduje ari; tẹme ẹbe ẹphe ekwejedu eme iphe, ne pẹ lẹ nna pẹ pfuru. ³¹Ẹphe bụ ndu enwedu egomunggo; ọphu e gudedu ire pẹ ẹka. Ẹphe ta aphujeduru nwibe pẹ obu-imemini; ẹbe ẹphe enwedu obuoma. ³²Ẹphe bụ ndu machacharu iphe, bụ ikpe Chileke; maru lẹ ndu eme ẹgube ẹjo-iphẹ ono bụ onwu, bụ iphe, gbaru pẹ nù. Ọphu ọ bụdua l'ẹphe eme nno; obenu lẹ ndu eme g'ẹphebedua agbeje dū pẹ ree.

Ikpe, Chileke nmaru onyemonye

2 ¹Noo g'o gude mu sù ngu l'ì tì g'ofukwapho gube onye ọphu ekpe onye ọzo ikpe; onye ì bụhabe. Kẹle ọo iphe ono, iikpe onye ọzo ikpe iya ono bẹ i gudekwapho anma onwongu ikpe. Kẹle gubedua, l'ekpe ikpe emekwapho iphe ono, iikpe onye ọzo ikpe iya ono. ²Ọle ọphu anyi makaharu bụ l'ikpe Chileke pfuru-oto l'ẹhu ndu eme ẹgube iphe ono. ³Gube nwodumeka; ?I dobesu lẹ teke ịgbarwushije ndu eme ẹgube iphe ono; bya emekwa iya pho l'onwongu; ?i dobesu l'ị-nahụ ikpe kẹ Chileke? ⁴?Tọo; bụ eze odoo ọphu parụ ẹka apaa, Chileke emeje; waa l'ọ bujeru nemadzụ -mee iphe-ẹji l'ọ parụ iya haa; tẹme ọ nọdu anọduje ata nshi shii; ?bụ iphemiphe ono, bẹ i woru nmaa phulaphula? Ọphu ì madu l'iphe, o gude Chileke nọdu emejeru ngu odoo bụ l'ooome g'izimanu lwa ngu azu; g'ì haa eme iphe-ẹji lwapfuta iya. ⁵Obenu lẹ nta-a bẹ i nweru ẹjo ọkpoma kwefu ike g'odoo, Chileke eme te eme g'izimanu lwa ngu azu. Ọo ya bụ l'iime g'iphe-ẹhuka nkengu ka shii mbọku ikpe ono, Chileke

e-goshi oke-ẹhu-eghu iya me g'ikpe nkiya du, bu iya bu ikpe pfuru-oto ono. ⁶Mboku ono be Chileke e-bukwa onyemonye nggo le g'iphe, o meru gbaru. ⁷Ndu taru nshi nodu eme iphe, du ree; kukebe ẹhu acho ge Chileke jaa phe ajaja; kwabe phe ubvu; be oo-me g'ephe nodu ndu ojejoje; ephe taa nwuhubaedu anwuhu. ⁸Obenu le ndu ono, bu ndu kwefuru ike ono; ndu ata ngaduru okpobe-opfu nchi; o chia iphe, ephe etso bu iphe, apfuduru-oto; ndu ono be Chileke a-tu-koshi oke-ẹhu-eghu iya, paru aka. ⁹Iphe, bu onye emekpo ejo-iphe be ẹhu ta abyadu eburu ebvuru; teme o je le-je iphe-ehuka iya. Oo-vuru uzo dapfuta ndu Jiu; teme ndu abudu ndu Jiu etsota iya. ¹⁰Obenu l'onyemonye, eme iphe, du ree be Chileke a-ja ajaja; kwabe iya ubvu bya emee; ẹhu adu iya guu jasu le tuutuutu le miimi. Oo-vuru uzo meuru iya ndu Jiu; teme ndu abudu ndu Jiu etsota iya. ¹¹Kele Chileke ta adudu onye oole enya l'iphu.

¹²Iphe, bukpo onyemonye, amadu ekemu mee iphe-aji be Chileke a-nmakwa ikpe; ephe alaa l'iyi; obeta ebe ephe amadu ekemu. Iphe, bukwanu ndu bu ndu maru ekemu bya emeela iphe-aji be Chileke e-gudekwapho ekemu ono nmaa ikpe. ¹³L'o to bukwa ndu anumaje ekemu be bu ndu pfuberekoto l'iphu Chileke; o chia ndu eme iphe, ekemu pfuru bu ndu Chileke a-gu le ndu pfuru-oto. ¹⁴Le teke o bu le ndu abudu ndu Jiu, bu iya bu ndu amadu ekemu gb e egudeje uche phe eme iphe, du l'ekemu; bu nu iya-a bu l'ephe egoshi l'ephe maru iphe, gbaru phe l'ememe; obeta ebe ephe amadu ekemu. ¹⁵Umere phe egoshi l'iphe, ekemu pfuru be Chileke dewaru phe l'obu. Teme egomunggo phe nodu agbakwa phe pho ekebe; eshinu oriri phe anoduje anmaa phe ikpe bya ahajekwarupho aharu phe enge. ¹⁶Mboku ono, Chileke e-kpe ikpe ono be oo-gbe Kereshi Jizosu l'eka kpee nemadzu ikpe iphe, nemadzu arije domia l'okpoma iya. Noo iphe, ozi-oma ono, mu anoduje ezi onoya pfuru.

Ndu Jiu ephe l'ekemu

¹⁷A bya l'ehu gubedua, bu onye Jiu; i nodu etu onwongu onye Jiu bya akporu obu ye l'ekemu; bya egude gule Chileke aba l'abaa. ¹⁸I maru iphe, bu uche Chileke; teme ekemu iya nodu egoshi ngu iphe, gbaru ngu l'ememe; me iphe, agbaduru ngu l'ememe. ¹⁹I makaharu l'i bu onye edu ndu atsushi; bya aburu iphoro ke ndu no l'ochii. ²⁰I buru onye akpo-ziru ndu eme eswe uzo; bya aburu onye ezi ndu bu unwegirima iphe. I maru ekemu Chileke; bya amaru okpobe-opfu du l'ekemu ono. ²¹Oo ya bu; eshi ophu inoduje ezi ndu ozo; bu gunu kparu iphe, i tii zidu onwongu? Gube onye ara iya arara su g'e te zijeshi iphuru; ?tii zikwanu iphuru l'onwongu? ²²Gube onye epfu su g'e te erijeshi ogori; ?ti rikwanu ogori? Gube onye ono, agburu nshi, a gworu agwogwo tuphe ?ti jejekwanu ezita iphe, e doberu leze-ulo-nshi? ²³Gube onye ono, aba abaa le Chileke taru ekemu doberu ngu ono; ?ti nodujekwanu emebyishi ekemu obu; gude

iya eme Chileke iphe-iphere. ²⁴Le dekwaru l'ekwo-opfu Chileke sù: “Ndu ohozo epfubyishi Chileke; ọ buru umere unu kparu iya.”

²⁵Urwu dukwa l'ebu úbvù bú eviya; ọle ọo 'ekwapho mę ọ -buru l'i meje-a iphe, ekemu pfuru. Obenu teke ọ bú l'ìnoduje emebyi ekemu bę gù l'onye ebuduru úbvù a-gbaru l'ęjì. ²⁶Nokwapho g'ọ dų onye ebuduru úbvù. Teke ọ bukwanu l'onye ebuduru úbvù emeje iphe, ekemu pfuru; ?ta agudu iya l'onye buru úbvù to? ²⁷Oo ya bú lę ndu abudu ndu Jiu ono, bú ndu ebuduru úbvù ono l'a-nma gube onye Jiu ikpe. Unubedua, bú ndu Jiu nweru ekemu, e deru l'ekwo bya ebua úbvù; teme unu gbę emebyi ekemu. ²⁸Onye buępho onye Jiu l'ęnya ndiphe ta bukwa iya bú l'a bú onye Jiu. Ophu ebu úbvù ophu eebu l'anu-ęhu abukwa iya pho bú l'e buru úbvù. ²⁹Iphe, bú okpobe onye Jiu bukwa onye bú iya nù l'ime okpoma iya. Okpobe ebu úbvù; buru ophu eebu l'ime obu, bú iya bú ophu Unme Chileke buru nemadzu; ọ to bukwa ophu e buru l'oo g'e mee ya g'e deru l'ekwo ekemu. Egube onye ono ta abukwa nemadzu ajaje iya ajaja; ọ kwa Chileke bę ajaje iya nù.

3 ¹Su-a; ?bukwanu gunu bę onye Jiu gude ka onye abudu onye Jiu mma? ?Denukwanu urwu, dų l'ebu úbvù? ²O kwatakpoakwaaru baa urwu, ha shii l'uzomuzo. Kę mbu kpada bú l'oo ndu Jiu bę Chileke woru opfu, o pfuru ye l'ęka. ³Lę-a; ọme ọ bukwanu l'ęphe haru buru ndu ekwetaduru nù teke ono; ?e gege gude l'ęphe te ekwetaduru sù lę Chileke bę ta agbaduru g'e gude ire iya ęka to? ⁴Tuswekwa! G'e goshichikwa lę Chileke ta adudu teke ọ buedupho onye ire-lanu g'ọ bú; o betakpooru nemadzu mgburugburu je a-bueberu ndu ntuphu-ire. Noo iphe, e deru l'ekwo-opfu Chileke sù:

“Oo l'opfu ngu Chileke bę
ee-shi goshi
l'i bú onye pfuru oto.
Ophu ọ dudu teke e kuru ngu
ikpe g'i ti kpefu.”

⁵Teke ọ bukwanu l'oo l'anyi ta agbaduru g'e gude ire anyi ęka emeje g'a huma gę Chileke gbaberu k'egude ire iya ęka; ?buhunu gunu bę anyi e-pfu? ?Anyi a-sù lę Chileke meru ęjo-iphe l'ọ kpaberu anyi oke-ęhu-ęghu iya? Nta bę mu ajikpoakwa aji-a gę ndiphe ozo anoduje aji. ⁶Tuswekwa! O -bù l'ọ to dų nno mę ?Chileke emehunu imagha oo-kpe ndiphe ikpe?

⁷Lę-a; teke ọ bú onye ntuphu-ire; ọ buru iya agbeje mee g'a kabaa amaru lę Chileke bú onye ire-lanu; jaa ya ajaja; ?denu g'o gude Chileke jehunu a-nma mu ikpe lę mu bú onye iphe-ęjì? ⁸?Bù gunu kparu iphe, anyi tee pfudu iphe ono, ndu anoduje agbaru anyi mgbamu; ebo anyi ibo suru l'anyi epfuje ono? Iphe ono bú: “G'anyi meanaro ęjo-iphe g'ee-shi gę k'oma eshi iya futa.” Ndu ono bę Chileke a-nmakwa ikpe, bú iphe, gbaru phę nù.

Ikpe, nmaru onyemonye

9?Nta-a-ee? Onodu anyibe ndu Jiu ?o ka ke ndu abudu ndu Jiu mma to? Tuswekwa! Anyi ta akakpoda phẹ mma ililekpoo. Iphe, anyi goshiru bu l'anyibe ndu Jiu; me ndu abudu ndu Jiu tukoru buru ndu iphe-eji pyi-taru lekpiri. 10Le dekwaru lekwo opfu Chileke su:

“O to dukwa me onye
pfuberekoto;
mbukwa m'onye lanu.

11 Ophu o dudu me onye lanu,
nweru egomunggo;
ophu o dukwapho onye
eseje ge ya maru Chileke.

12 Onyemonye ghawaru Chileke
azu.

Ephe tukowaru yifu.
O to dudu onye ophu eme
iphe, pfuru-oto
g'o ka mma l'oo onye lanu.

13 Ekpiri phe bu ilu, gheru onu.
Ire phe be ephe egudeje
edepushi nwibe phe.
Opfu, shi phe lonu nodu
egbu egbugbu
g'eru ejo agwo.

14 Iphe, jiru phe onu bu ephu
iphu
yee opfu, shi lokpoma
mgbashi.

15 Ephe ekwoje gburumu je
egbua nemadzu.

16 Uzo, ephe eshi bu iphe,
aduje iya nu bu ola-l'iswi
yele aphu.

17 Ephe ta amadu uzo nchi
adu-doo.

18 Ophu ephe ta atsudu Chileke
ebvu ililekpoo.”^a

19Ophu anyi makahakpoo bu l'iphemiphe, e deru lekwo ekemu Chileke bu ndu a tu-doru ekemu obu be e dedoru iya. Oo ya bu g'o to du

^a 3:18 Guna Ebvu 36:1.

onye a-gofu nū. Onu aburu onyemonye kpurukuduku; wafua g'onyemonye e-shi egube ono buru onye-ikpe nmaru l'iphu Chileke. ²⁰Iphe, o gude o du nno bu l'o to dudu onye a-su le ya e-gude eme g'ekemu pfuru buru onye pfuberekoto l'iphu Chileke; eshinu iphe, ekemu emeje bu l'o meje ge nemadzu maru le ya mewaru iphe-eji.

Apfubekoto ophu shi l'ekweta

²¹Obenu le nta-a be e goshiwaru iphe, bu apfubekoto ke Chileke, abudu ophu shi l'edobe ekemu. Iphe ono buru iphe, ekemu me ndu mpfuchiru Chileke gbaru ekebe iya. ²²Apfubekoto ke Chileke-a; shi l'ekweta anyi kwetaru ke Jizosu Kereshi rwube anyi aka. O to dudu onye oogufuje me nanu; ²³kele onyemonye mewaru iphe-eji; shi nno nafu onwiya odu-biribiri ke Chileke. ²⁴Obenu le Chileke mewaru onyemonye eze-iphe-oma ke mmanu gua ya l'onye pfuberekoto. O buru onye o shi l'eka mee ya bu Kereshi Jizosu onye meru g'ephe nweru onwophe. ²⁵Chileke goshiru Kereshi l'edzudzu-oha go buru aja, e gweru gwefu iphe-eji ndiphe. O buru mee, Kereshi ono gbashiru teke o nwuhuru ono be Chileke egudeje aguru nemadzu nvu l'iphe-eji iya; mbu ndu woru onwophe ye iya l'eka. Chileke shi egube ono mee ge ya goshi le ya pfuberekoto. Le teke ndiche be Chileke shi abujeru onye meru iphe-eji l'o taalaa nshi lephua ya enya. ²⁶Ole nta-a be oogoshije ge ya eshije mee ndiphe g'ephe buru ndu pfuberekoto; kele yebdua bu onye pfuberekoto bya abukwarupho onye emeje iphe, bu ndu kwetaru ke Kereshi g'ephe buru ndu pfuberekoto.

²⁷Su-a; ?o dukwaduru onye duru iphe, oo-nodu aba l'aba nta? O to dukwa. ?O buru aka o meru imagha? ?Bu l'anyi eme iphe, ekemu pfuru to? Waawakwa. O buakwaa l'anyi woru onwanyi ye Kereshi l'eka. ²⁸Kele iphe, anyi maru bu le Chileke agujeekwapho nemadzu l'onye pfuberekoto me o -buru l'onye ono kwetaru ke Kereshi; o to bukwa shita l'eme iphe, ekemu pfuru. ²⁹Chileke ?o bu Chileke ndu Jiu kpurumu to? ?To buedu Chileke ke ndu abudu ndu Jiu? Ee! O bufua Chileke ndu abudu ndu Jiu. ³⁰O buepho Chileke lanu du kpoloko. O buru iya a-gu ndu Jiu, kweru ke Kereshi le ndu pfuberekoto; bya abukwaru iya pho a-gu ndu abudu ndu Jiu, kweru ke Kereshi le ndu pfuberekoto. ³¹?O pfuru l'anyi gudewaa k'ekweta-a rwutoshia ekemu to? Tuswekwa! Iphe, anyi emechia bukwa g'ekemu nguru anguru.

Iphe-nggoshi, Ebirhamu meru

4 ¹?Denu iphe, anyi e-pfu le ke Ebirhamu, bu nnaji ndiche anyi phe? ?Denu go nwuru ye ya? ²Le teke o bu l'oo iphe-oma, Ebirhamu metaru be Chileke gude gua ya l'onye pfuberekoto; be o nwekwaru iphe, o gogo gude aba l'abaa; ole o to bukwanu l'iphu Chileke. ³Noo iphe, e deru lekwo-opfu Chileke su: "Ebirhamu kwetaru ke Chileke; a guaru iya ya

l'apfubekoto.”⁴ Sù-a; onye jeru ozi bẹ a ta sujekwa l'iphe, a nùru iya lẹ k'ozì onò bụ iphe-oma bẹ e meru iya; gbahaa l'ọo ụgwo, rwuberu iya nù bẹ a pfuru iya.⁵ Obenu lẹ teke nemadzụ gwọberu k'ese akanya ẹhu iya; bya ekweta kẹ Chileke onò emeje g'onye iphe-ẹjì buru onye pfuberekoto onò; a ọaru iya ya l'apfubekoto.⁶ Ọ kwaphọ iphe, dụ nno bẹ Dévidi tųberu epfu teke onò, o pfuru k'ẹhu-utso nwoke ophu Chileke ọuru l'onye pfuberekoto; l'ẹbe abụ l'o gude ẹka iya meta gẹ Chileke nata iya.⁷ Ọ sọru:

“Ehu-utso bẹ a ọru nù ndu a ọuru nvu
l'iphe, ẹphe mesweru; ndu a
safubebewaaru iphe-ẹjì, ẹphe megbabẹru.

⁸ Ehu-utso bụ k'onye Nnajiuphu taa
gụkoeduru iphe-ẹjì ililekpọo.”^b

⁹ Ọ dụ g'ọ buẹpho ndu buru úbvù kpẹekpu bẹ Chileke epfu l'ẹka-a g'ẹhu tsoo utso? Tọo; ?ndu ebuduru úbvù yì iya-a? Eshinu anyi sọru: “Ébirihamu kwetarụ kẹ Chileke; a ọaru iya ya l'apfubekoto.”¹⁰ ?Dẹ-nu g'eshiru ọaru iya ya? ?Bụ teke o toko budu úbvù; tọo g'ọ buwaru úbvù? Ọ ọadaru iya ya tẹme o bua úbvù.¹¹ Úbvù onò, o buru onò buru iphe-ọhubama, goshiru lẹ Chileke ọuru iya rọ l'onye pfuberekoto; kele o kwetarụ kẹ Chileke teke o toko budu úbvù. Ọo ya bụ gẹ Ébirihamu aburu nna k'iphe, bukpo ndu woru onwophe ye Chileke l'ẹka; ndu Chileke ọuru lẹ ndu pfuberekoto l'ẹbe abụ l'ẹphe buru úbvù.¹² Ọ bukwarupho nna ndu buru úbvù; ọle ọ tọ bukwa nna phe; opfu l'ọo l'ẹphe buru úbvù; iphe, o gude buru nna phe bụ l'ẹphe tsoo ẹka Ébirihamu, woru onwiya ye Chileke l'ẹka tẹme o bua úbvù.

Ọphu bụ ishi bụ ekweta

¹³ Chileke kweru Ébirihamu yee awa iya ukwe-iphe sụ phe: l'ọo phe e-nweru mgboko. Ọ tọ bukwa lẹ Ébirihamu meru iphe, ekemu pfuru meru iphe, o gude kwe iya ukwe-iphe onò. Ọ kwa l'o kweru kẹ Chileke meru iphe, Chileke ọuru iya ya l'apfubekoto.¹⁴ Sù-a; ome ọ bụ ndu eme iphe, ekemu pfuru bẹ e-nweru mgboko onò, Chileke kweru ukwe iya onò mẹ ekweta aburu iphe-mmanụ; mẹ ukwe-iphe, Chileke kweru tege vukwarupho ire.¹⁵ Kele ekemu akpatsuje oke-ẹhu-eghu. Noo l'ẹka ekemu adudu bẹ emeswe adukwapho.

¹⁶ Noo g'ọ gude iphe, Chileke kweru ukwe iya onò buru iphe, shi l'ekweta; g'ee-shi g'ọo-buru iphe, shi l'eze-iphe-oma, oome; mbụ ophu o mekwarupho gbabẹ awa Ébirihamu. Ọ tọ bukwapo ndu emeje iphe, ekemu sọru g'e meje kpurumu. Chileke dobekwaru iya phọ iphe, bụ ndu kwetarụ nù gẹ Ébirihamu kwetarụ. L'ọ kwa Ébirihamu bụ nna anyi g'anyi hakotakpo.¹⁷ Ọ buru iya bụ iphe, e deru sù: “Mu meakwaru ngu nna

^b 4:8 Gūnaa Ebvu 32:1,2.

igwerigwe oha.” Oo ya bu le Ébirihamu bu nna anyi l'iphu Chileke, bu onye o kweru nkiya; mbu Chileke, emeje ndu nwuhuru anwuhu g'ephe dzuru ndzu ozo; teme o nodu emeje iphe, eshihaada du nu l'oo-bya adu. ¹⁸Ébirihamu woru onwiya ye Chileke l'eka; bya anodu ele enya iphe; teke adudu iphe, o tuberu ele enya iya. Oo ya bu; o buru nna ohamoha, du igwerigwe, bu iya bu nu iphe, e pfuru iya su: “Noo g'awa ngu a-ha bu ono.”

¹⁹Ophu o dudu teke Ébirihamu kwenyaaru ke Chileke bya akpohaa okpolohu. Ophu o pfuduru kele ya kahwaru; libahuchawaa alibahu ophu ya a-duedu ike eye ime; l'eka o nowaru iphe, ha g'ukporo apha ise eshinu a nwuru iya; ophu o pfuduru ke nyee ya, bu Sera, ata tsudu ime. ²⁰O to dudu teke obu bojeru iya ebo l'iphe, Chileke kweru iya ukwe iya; kele o noshierupho ike l'eka Chileke akwabee ya pho ubvu. ²¹O dokporu iya enya okpobe edodo le Chileke suru emekota iphe, o kweru iya ukwe iya. ²²Noo g'o gude Chileke garu iya ya l'apfubekoto. ²³O to bukwa l'iswi ehu Ébirihamu kpeekpu be e dedoru iphe ono, e deru su: A guru iya ya l'apfubekoto. ²⁴O kwa l'iswi ehu anyibedua be e dedokwaru iya pho, bu ndu Chileke e-mechaa gua le ndu pfuberekoto; me o -buru l'anyi kweru ke Chileke, bu iya bu onye meru Nnajiuphu anyi, bu Jizosu; o shi lonwu teta dzuru ndzu. ²⁵Jizosu ono be Chileke haru; o gude onwiya gwee eja nwuhu k'ophu oo-gwefu iphe-eji, anyi meshiru. Chileke bya emee ya; o shi lonwu teta dzuru ndzu g'e-shi ge ya agua anyi le ndu pfuberekoto.

Adu le mma onye le Chileke

5 ¹Oo ya bu le Chileke gwaru anyi le ndu pfuberekoto opfu l'anyi kweru nkiya. Nta-a be anyi shiwaa l'eka Nnajiuphu anyi, bu Jizosu Kereshi; ehu duwaa anyi guu lonodu anyi le Chileke. ²Oo Jizosu Kereshi ono shi lekwekwe, anyi kweru nkiya duba anyi leze-iphe-oma owana-wa, anyi gude dzuru ndzu-a. Ehu nodu anoduje atso anyi l'anyi ele enya l'anyi le Chileke e-mechaa gbaru mba l'odu-biribiri iya. ³O to bukwa ono kpurumu; ehu atsojekwapho anyi utso me anyi nodu eje iphe-ehuka; opfu l'anyi humawaru l'oo l'iphe-ehuka be eeshije nwuta ata nshi. ⁴O buru ota-nshi emeje g'anyi shihu ike lohutama. Anyi eshi egube ono kaba apfushi ike l'iphe, anyi ele enya iya. ⁵Ophu ele enya iphe ono, anyi ele ono emebyidu anyi iphu; kele Chileke lonwiya mewaru anyi gbé l'eka Unme-du-Nso, o nuru anyi maru ge n-yemobu iya habe shii.

⁶L'o kwaduro teke adudu ike, du anyi k'eme iphe, du ree l'iphu Chileke be Kereshi byaru bya anwuhu-chiru ndu ata tsudu Chileke ebvu. Iphe ono buru teke Chileke tuberu be o meru. ⁷Kele o dukwa le nta ge nemadzu e-shi nwuhu-chiru onye pfuberekoto. Ole a -choje iya be aahumakwaa onye a-nwuhu-chiru onye oma. ⁸Obenu le Kereshi nwuhuru l'iswi ehu anyi teke anyi bukwa ndu eme iphe-eji; shi nno goshi le

Chileke yenūkaru anyi obu. ⁹Ọo ya bụ l'eshinu Chileke shiwaa l'anwūhu, Jizọsu nwūhuru; gụa anyi lẹ ndu p̄f̄uberekoto l'ip̄hu iya bẹ ọo-kabakp̄o-kwanu adū ike shi l'ẹka Kéreshi ono dzọta anyi; g'a taa tū-koshidu anyi oke-ẹhu-eghu iya. ¹⁰Su-a; eshinu anyi shi b̄uru ọhogu Chileke; Chileke bya eshiwaa l'anwūhu, Nwa iya nwūhuru mewaa anyi b̄uru ọnyà iya; bẹ nta-a, anyi b̄uwaa ọnyà iya-a bẹ ndz̄u Kéreshi ọphu nọ anyi l'ẹhu a-kabakp̄okwaanu adzọta anyi l'oke-ẹhu-eghu Chileke. ¹¹Ọphu ọ b̄udua ono kpoloko; anyi n̄okwapho l'ẹka Nnajiuphu anyi, bụ Jizọsu Kéreshi ete ẹswa; mb̄u onye ono, meru anyi lẹ Chileke doshiwaa ono.

Ádamu lẹ Kéreshi

¹²Su-a; ọ kwa nwoke lan̄u bẹ ip̄he-ẹji shi l'ẹka bata lẹ mgboko. Ọnwu shikwapho l'ip̄he-ẹji ono batakwapho lẹ mgboko. Ọo ya b̄u; ọnwu shi nno swiru ip̄he, b̄ukpoo nemadz̄u; kele onyemonye mewaru ip̄he-ẹji. ¹³Ip̄he-ẹji dzuhaakwaru elip̄he teme ekemu bya. Ọle a ta ḡukoduru nemadz̄u ip̄he-ẹji l'ẹka ekemu adūdu. ¹⁴Ọle ọnwu shīl̄aa l'ogbo ke Ádamu p̄he b̄uru eze jas̄u l'ogbo ke Mósisu; mb̄u b̄uchaaru eze ndu emesweduru ekemu ge Ádamu mesweru.

Ádamu l'onwiya b̄u onyonyo Kéreshi, b̄u iya b̄u onye ọphu, e-mechaa byan̄u p̄ho. ¹⁵Obenu l'ip̄he-oma ke Chileke bẹ a ta t̄ukwa eyeru ip̄he-ẹji ke Ádamu. Kele ọ -b̄uru l'ip̄he-ẹji, onye lan̄u meru; bẹ meru a d̄u igwerigwe nwūhu; nokwapho ge Chileke a-kabakp̄oo eshi l'ẹka onye lan̄u ono, b̄u Jizọsu Kéreshi meeru ndu d̄u igwerigwe eze-ip̄he-oma, nȳiberu anyibe. ¹⁶Ọphu ip̄he-oma ke Chileke ad̄ukwanu ge ip̄he-ẹji, onye lan̄u meru. Likpe, nmakotaru ndip̄he mgburugburu k'ip̄he-ẹji ono. Obenu l'ip̄he-oma ọphu Chileke meru nȳiberu igwerigwe ip̄he-ẹji; shi nno mee aḡuhaa ndip̄he lẹ ndu p̄f̄uberekoto. ¹⁷Kele eshinu ọ b̄u emeswe, onye lan̄u mesweru bẹ ọnwu shi l'ẹka onye lan̄u ono b̄uru eze; bẹ ndu ono, shiwaa l'ẹka Jizọsu Kéreshi nata eze-ip̄he-oma ke Chileke ono, b̄u ip̄he-oma ọphu nȳiberu anyibe ono; waa ip̄he-oma ọphu b̄u ap̄f̄ubekoto; ndu ono a-n̄odu l'ẹka onye lan̄u ono, b̄u Jizọsu Kéreshi b̄uru eze lẹ ndz̄u-a.

¹⁸Ọo ya b̄u l'oo g'emese, onye lan̄u mesweru kpar̄u ip̄he, Chileke nmakotaru onyemonye ikpe; b̄ukwapho ge Chileke shi l'ap̄f̄ubekoto Kéreshi mee g'ikpe kal̄eru onyemonye ge ndz̄u d̄u p̄he. ¹⁹Kele ọo ge nwoke lan̄u ono meru ip̄he, Chileke s̄uru g'o to meshi; e shi ẹgube ono mee ndu d̄u igwerigwe ẹp̄he b̄uru ndu ip̄he-ẹji; b̄ukwapho g'ee-gude k'onye lan̄u ọphu meru ip̄he, Chileke s̄uru g'o mee; Chileke aḡua ikpoto nemadz̄u lẹ ndu p̄f̄uberekoto.

²⁰Ip̄he, e gude e mechaa t̄ua ekemu dobe b̄ukwa g'a kabaa amaru g'ip̄he-ẹji habe shii. Obenu l'oo teke a kabaa amaru g'ip̄he-ẹji habe shii; eze-ip̄he-oma ke Chileke akwata kabakwapho shii. ²¹Ọ kwa anwūhu b̄u ip̄he-ẹji gude b̄uru eze. Nokwapho g'ọ b̄u ap̄f̄ubekoto bẹ eze-ip̄he-oma

ke Chileke gude bukwarupho eze. O buru apfubekoto ono, shi l'eka Nnajiuphu anyi, bu Jizosu Kereshi ono edu anyi ala le ndzu ophu onwu ta aduhedu.

Iphe, bapuzizimu eme

6 ¹Su-a; ?bu awe be anyi suseru iya ishi nta-a? ?Anyi a-noduje eme iphe-eji g'eze-iphe-oma ke Chileke aka shii to? ²Tuswekwa! ?Denu g'anyibe ndu nwuhuwuru anwuhu l'iphe-eji e-shi nodukwapho ndzu l'ime iya ozo? ³Too ?unu ta amadu l'e shiwaale le bapuzizimu mee anyi du igwerigwe buru ndu a tugbaberu l'anwuhu ono, Kereshi ono? ⁴Le teke ono, e meru anyi bapuzizimu ono be anyi l'iya tukwakwaru nwuhu; a tuko anyi l'iya likota. Oo ya bu le-a; oo egube ono Kereshi gude ike akpabiri ke Nnashi l'onwu gbalihu dzuru ndzu ono bukwapfo g'anyi a-du ike dzuru ndzu ophuu.

⁵O -buru l'anyi le Kereshi tugbaru buru nanu l'anwuhu, du g'ophu o nwuhuru; o n'iya bu Chileke emee g'anyi shi l'onwu teta g'o meru iya; anyi l'iya adzuru ndzu ophuu. ⁶Ophu anyi maru bu owa-a: l'e wotaru akahu onye anyi shi buru woru yee Kereshi tuko kpopyabe loswebe; oo ya bukwanu; g'ee-mebyia ike kejo obu ono, anyi shi nweru teke ono, buepfo iphe-eji be anyi shi maru ono; g'anyi ata abueduru ohu k'iphe-eji. ⁷Lo kwa teke nemadzu nwuhuru bu teke yele ike k'eme iphe-eji tokaharu ishi anamu. ⁸Teke o bukwanu l'anyi le Kereshi tugbaru nwuhu be anyi maru l'anyi l'iya a-tukokwapho dzuru ndzu. ⁹L'iphe doru anyi enya bu l'eshinu Chileke meru ge Kereshi shi l'onwu teta dzuru ndzu be o to nwuhubaedu ozo. Anwuhu ta abyadu akabaa ya ike ozobaa. ¹⁰Anwuhu ophu o nwuhuru bu lo nwuhuru mgbo lanu kpoloko kpekpu g'o mekpee iphe-eji. Ndzu ophu o dzu nta-a buwaru ge yee Chileke buru nanu jasuwaruroya. ¹¹Nokwapfo g'unu a-guje onwunu l'unu buwaa ndu nwuhuru anwuhu me a -bya l'eka iphe-eji no. Ole eshinu unu le Kereshi Jizosu tugbawaru buru nanu be buwaa Chileke be unu dzuru ndzu.

¹²Unu te ekwekwa g'iphe-eji buru eze l'ehu unu owa-a, bu ophu a-nwuhu anwuhu-a; k'ophu bu lo o ejo-iphe, agu unu, o suru g'unu mee be unu e-meje. ¹³Unu te ewokwaru iphe, no unu l'ehu g'o hahabe nwanshi haaru iphe-eji g'o buru iphe, o gude ejepfu iphe, pfuru oto ogo. O chia iphe, unu e-me bu g'unu woru onwunu hagbuaru Chileke l'unu buwaa ndu shi l'onwu futu bya anodu ndzu. Oo ya bu ge Chileke egude unu alwu ogo iphe, pfuru oto. ¹⁴Iphe-eji ta akaedu unu ike; eshinu ekemu ekeeduru unu egbu; kele nta-a be Chileke gudewaa eze-iphe-oma iya too unu legbu ekemu ono.

Aburu ohu k'apfubekoto

¹⁵Su-a; ?o pfuru l'anyi anoduwaro eme iphe-eji; opfu l'eze-iphe-oma ke Chileke tofuwaru anyi; ebe ekemu ekeeduru anyi egbu to? Tuswekwa!

¹⁶Unu ta amahaadaa lẹ teke unu woru onwunu haaru nemadzu bya emeje iphe, o pfuru g'ohu iya be unu buwaa ohu onye obu, unu emeje iphe, o pfuru obu. Teke o bu l'unu woru onwunu haaru iphe-eji; buru ohu iya; unu anwuhu anwuhu, bu iphe, tso iphe-eji l'azu. Teke o bukwanu l'unu emeje iphe, Chileke pfuru; oo ya bu l'oo-gua unu le ndu pfuberekoto l'iphu iya. ¹⁷Ole mu ekele Chileke ekele l'o duru teke unu shi buru ohu iphe-eji; obenu le nta-a be unu gudewaa obu unu g'o ha eme iphe, bu okpobe-opfu ono g'e ziru iya unu. ¹⁸Eshinu a towaru unu legbu, iphe-eji shi kee unu be unu buwaa ohu k'apfubekoto. ¹⁹Mu gudeakwaa ehu ohu le nnajiuphu iya anmaru unu etu; odumeka be iphe, mu epfu te edokwa unu enya. Egube ono unu shi woru onwunu haaru ejo umere, rehuru erehu; waa akabaa eme iphe, apfuduru-oto g'e-shi g'iphe-eji akabaa shii ono; bukwapho g'unu e-woru onwunu haaru eme iphe, pfuru oto nta-a; g'e-shi g'endzu unu abukotaru ke Chileke.

²⁰Kele teke unu shi buru ohu iphe-eji; be unu eshidu eyeru apfubekoto onu. ²¹?Buhunu urwu gunu be unu ritaru lejo-iphe ono, unu shi eme ono; mbu iphe ono, iphere iya byaru adu unu nta ono? Kele aka iphemiphe ono sberu ishi bukwa anwuhu. ²²Obenu le nta-a be a towaru unu legbu ono, iphe-eji shi kee unu ono; unu buwaru ohu Chileke. Urwu, unu ritaru iya buru le ndzu unu bukotawaa ke Chileke. Eka o sberu ishi buru ndzu ojejoje. ²³Ugwo, aanata l'iphe-eji bukwa anwuhu; iphe-oma, Chileke eme bukwanuru ndzu ojejoje ophu shi Nnajiuphu anyi, bu Jizosu Kereshi l'eka.

Etu iphe, emeje nu l'alulu

7 ¹Su-a; unwunna mu; ?unu ta amadu le teke ekemu bu-beru ishi le ndzu nemadzu bu teke onye ono no ndzu? O kwa unube ndu tukoru maru ekemu be mu epfuru. ²Kele ekemu bu le nwanyi, alu ji nofutaje l'eka ji iya jasukporu teke ji iya l'a-no-beru. Ole teke a nonyaaru; ji iya nwuhu be o nwewaa onwiya. Ekemu ono, shi gudepyabe iya nu ono ta aduedu iphe, o bu. ³Bu iya bu le teke ji iya nokwadu ndzu; o je aluru ji ozo; laasu l'oori ogori; teke o bu le ji iya nwuhuwaru; l'o buru nwanyi eke ji. Ekemu te egudepyabedu iya. O to buedu iya eri ogori me o -je aluru ji ozo. ⁴Su-a; noo g'o du l'ehu unu bu ono; unwunna mu. Oo ekemu shi buru ji unu; ole unu le Kereshi tugbawaru nwuhu. Oo ya bu l'eshi ophu unu nwuhuwaru be ekemu abuedu ji unu. Ebe o duedu iphe, unu l'iya jigba. E mecha; unu bya adzuru ndzu ozo teke ono, Kereshi tetaru dzuru ndzu ono. Nta-a, be buwaa onye ono, shi lonwu teta dzuru ndzu ono bu ji unu; k'ophu anyi a-dzuru ndzu, pfuru oto meje iphe, du Chileke ree. ⁵Kele teke ono, anyi shi nodu ndzu eme g'o guru anyi ono be egu ejo-iphe, shi anoduje enwu phuruphuru l'ehu anyi meru anyi shi anoduje eme iphe-eji. Iphe, tso eme iphe-eji ono bukwanuru onwu. ⁶Ole nta-a be a dzowaru anyi l'eka ekemu. Anyi nwuhuwaru; nahu iphe ono, shi kee anyi egbu

ono. Oo ya bu l'anyi etsowaa uto ndzu ophuu ophu shi l'eka Unme-du-Nso ejeru Chileke ozi. Anyi te etsohedu akahu uto ono, bu iya bu ekemu ono, e deru l'ekwo ono gude eje iya.

Ekemu waa iphe-eji

⁷?Bu gunu be anyi e-pfu nta? Ekemu lonwiya ?o bu iphe-eji too? Tuswekwa! Mu tege amakwaru iphe, bu iphe-eji; ome ekemu ta adu. Mu tege amakwaru iphe, bu nchamnya ome ekemu ta asu: "G'iphe onye ozo ta agujekwa ngu." ⁸Iphe-eji shinu lekemu ono kpata uto je akpatsushia mu iphe, bukpo egi ejo-iphe ozo, dugbaa nu. Kele ekemu -adudu be iphe-eji nwuhukwaru anwuhu. ⁹Mbedua lonwomu duru teke mu shi nodu ndzu; ophu mu amadu k'ekemu. A nonyaa mu bya amaru k'ekemu ono; iphe-eji jakerehu mu l'ehu; o buru mu anwuhu. ¹⁰Ekemu onoya bu ekemu, gege eme g'a nodu ndzu ono gbey bya aburu ikpe be o nmaru. ¹¹Kele iphe-eji kpataru uto; gude ekemu ono wopyabe mu l'ugho; shi lekemu ono woru mu gbua.

¹²Oo ya bu lekemu lonwiya du nso. Iphe ono, a suru g'e meje ono du nso; bya aburu iphe, pfuru oto; bya adu ree. ¹³?O pfuru lo iphe ono, du ree ono gbey kpataru mu anwuhu to? Tuswekwa! O kwa iphe-eji gude iphe ono, du ree ono kpataru mu anwuhu g'ee-shi g'iphe-eji aburu iphe, aa-huma lo bu iphe-eji. Oo ya bu le Chileke shi l'iphe, e deru lekemu eme g'iphe-eji goshigbua gey yebe iphe-eji du-be ideyideyi.

Iphe labo adzo enya l'ehu amadu

¹⁴Iphe, anyi maru bu lekemu shi Unme Chileke l'eka; obenu le mu bu nemadzu mmanu, iphe-eji gbaru ohu. ¹⁵Umere mu lonwomu agbachijekwa mu enya; kele mu te emejedu iphe, du mu g'a su le mu meru iya. Iphe, mu emejechia bu iphe, du mu ashimememe. ¹⁶Su eshi ophu iphe, mu agbeje eme bu iphe, mu maru lo to dudu mu ree; oo ya bu le mu kweru lekemu du ree. ¹⁷O n'iya-a bu lo to budu mbedua l'eme iya. Iphe, eme iya nu bu iphe-eji ono, buwaa mu ebubu l'ehu ono.

¹⁸L'iphe, mu maru bu lo to dukpoda iphe, du ree, no mu l'obu ililekpo, bu iya bu l'obu egube nemadzu, mu shi buru teke mu shi anoduje eme ejo-iphe, agugbabe mu nu. Mu emeje gey mu mee iphe, du ree l'eme-me; ole mu ta adujedu ike mee ya. ¹⁹Kele mu te emejedu iphe, du ree, du mu g'a su le mu meru iya. Oo l'epho ejo-iphe ono, ata dudu mu gey mu mee ya ono be mu emeje. ²⁰Su-a; o -buru l'iphe, mu agbeje eme bu iphe, adudu mu ree; o n'iya bu lo to budu mbedua l'eme iya. Iphe, eme iya nu bu iphe-eji ono, buwaa mu ebubu l'ehu ono.

²¹Noo ya bu; mu shi egube ono huma ekemu, du adudu; lo bujeru; teke mu eme gey mu mee iphe, du ree; o buerupho ejo iya akpataje mu uto l'ehu. ²²Mu -bya l'ime onwomu be ekemu ke Chileke anodujekpokwaa

atsɔ mu ʊtso l'obu. ²³Obenu lɛ mu hɔmaru ekemu ɔzo, anɔduje adzo ʊzo l'ɛhu mu. Ekemu k'onno bɛ yɛlɛ ekemu ɔphu dɔ mu ree l'egomunggo pho anɔduje akpa ɛnya. L'ɔ tua mu mkpɔro kpuru mu nɔ iphe-ɛji. O bɔru ekemu k'onno bɛ aatɔjeru mu ekemu ɔphu kpɔ mu lɛ ndzɔ. ²⁴Nshio mu! ?Bɔkpoo onye a-dzo mu l'ogwehu ɔwa-a, edu mu ala l'onwu-a? ²⁵Nta bɛ mu nɔ l'ɛka Jizosu Kɛreshi, bɔ Nnajiuphu anyi ekele Chileke ekele. Mbɔ lɛ mu egudeje egomunggo eme ekemu kɛ Chileke l'onwomu; mu egude anɔ-ɛhu mu eme ekemu k'iphe-ɛji.

Unme, l'anɔje ndzɔ ɔphɔ́ú

8 ¹Oo ya bɔ lɛ ntamanɔ-a bɛ ɔ tɔ duɛdu ikpe, nmakwaduru ndu nɔ l'ɛka Kɛreshi Jizosu; ndu te emeɛdu iphe, agɔ phɛ ɛgu ememe; gbahaa iphe, Unme Chileke sɔru g'ɛphe mee. ²Kɛlɛ ekemu ɔphu Unme Chileke aturu mu nta-a bɔ ike, eshije Kɛreshi Jizosu l'ɛka duru nemadzɔ bahɔ l'ʊzo ndzɔ. O bɔru ike ono tofuwaru mu l'ike k'ekemu, bɔ iya eshije l'iphe-ɛji duru nemadzɔ bahɔ l'anwuhu. ³Iphe, ekemu adɔdu ike mee opfu lɛ nemadzɔ ta adɔjedu ike mee g'ekemu pfuru bɛ Chileke mewaru. O yewaru Nwa iya gɛgedede; ɔ bya aburu nemadzɔ; nweru anɔ-ɛhu, iphe-ɛji anɔduje akpasa ʊzo l'ɛhu g'ɛhu k'anyi; bya emee onwiya ngweja gwefu iphe-ɛji, anyi meru; shi nno mebyia ike k'iphe-ɛji ono. Chileke shi l'ɛhu ono, Kɛreshi nweru ono nmaa iphe-ɛji ikpe. ⁴Iphe, Chileke gude mee iphe ono bɔ k'ɔphu anyi a-du ike meɛbekota iphe, pfuru ɔto ono, ekemu pfuru ono. Kɛlɛ nta buwaa Unme Chileke bɛ anyi etso; anyi te etsoɛdu anɔ-ɛhu. ⁵Kɛlɛ ndu etso anɔ-ɛhu buɛpho g'ɛphe e-me mee iphe, dɔ anɔ-ɛhu ree bɛ aduje phɛ l'obu. Ndu etso Unme-du-Nsɔ bɔru iphe, ɔ sɔru g'ɛphe mee bɛ ɛphe emeje. ⁶Kɛlɛ akpɔru obu ye l'eme iphe, dɔ anɔ-ɛhu ree bukwa onwu; akpɔkwanuru obu ye l'eme iphe, dɔ Unme-du-Nsɔ ree bɔru ndzɔ waa ɛhu àgù. ⁷Noo kɛlɛ akpɔru obu ye l'eme iphe, dɔ anɔ-ɛhu ree bɔ ɔhogu Chileke; kɛlɛ o too tsodu ekemu Chileke; ɔphu ɔ byadu etso iya. ⁸ɔphu ndu emeje iphe, dɔ anɔ-ɛhu ree 'abyadu adɔ ike mee iphe, dɔ Chileke ree.

⁹Obenu l'unubɛdua te emejedu uche unu. O buwaa iphe, Unme-du-Nsɔ epfu bɛ unu eme; bukwa mɛ ɔ -bɔru-a lɛ Unme kɛ Chileke buphɔ ebubu l'ime ɛhu unu. Iphe, bukpoo onye enwedu Unme kɛ Kɛreshi ono ta abukwa onye nkiya. ¹⁰Tɛme l'ɔ -bɔru lɛ Kɛreshi bu unu ebubu l'ɛhu; bɛ ogwehu unu ta anɔkwa ndzɔ eme iphe-ɛji; obenu lɛ Unme Chileke buwaa ndzɔ l'ɛhu ndu pfuberekoto. ¹¹Teke ɔ bɔ lɛ Unme kɛ Chileke ono, meru gɛ Jizosu shi l'onwu teta dzuru ndzɔ ono, bu l'ime unu; ɔo ya bɔ lɛ yɛbedua ono, meru gɛ Kɛreshi Jizosu shi l'onwu teta dzuru ndzɔ ono l'e-mekwapho g'ɛhu unu ono, bɔ ɔphu a-nwuhu anwuhu ono dzuru ndzɔ. Chileke e-shi lɛ Unme-du-Nsɔ ono, bu unu l'ɛhu ono mee iphe ono.

¹²Oo ya bɔ; unwunna mu; anyi jikwa ɔgwo, abɔdu g'anyi meje iphe, dɔ anɔ-ɛhu ree. ¹³Lɛ teke unu eme iphe, dɔ anɔ-ɛhu ree bɛ unu

a-nwùhukwa anwùhu. Obenu teke ọ bụ l'unu shi l'ẹka kẹ Unme-dụ-Nsọ kpagbua umere ono, shi l'anụ-ẹhu unu ono; ọo ya bụ; unu anọdu ndzu. ¹⁴L'ọ kwa iphe, bukpuo ndu kweru gẹ Unme-dụ-Nsọ bụru onye a-nọdu edu pẹ nù bụ unwu Chileke. ¹⁵Lẹ Unme-dụ-Nsọ, Chileke nuru unu ta abukwa Unme, e-me g'unu bụru ohu k'ọphu ndzụ a-nọdu agụ unu. Ọchia iphe, unu nataru bụ Unme, e-me g'unu bụru unwu kẹ Chileke; anyi shi ẹgube ono arakuje iya su: "Abba! Nnana!" ¹⁶Ọ bụru Unme Chileke ono l'onwiya bẹ anọduje agba ekebe l'obu anyi l'anyi bụwaa unwu kẹ Chileke. ¹⁷Ọo ya bụ l'ọ -buru-a l'anyi bụwaa unwu iya; ọ n'iya bụ l'anyi bụwaa ndu Chileke a-nụ iphe, o kweru unwu iya ukwe iya. Ọo-nụ anyi iphe ono, ọ nūwaru Kéreshi ono. L'ọ -buru-a l'anyi lẹ Kéreshi tūgbaru eje iphe-ẹhuka bẹ Chileke e-mechakwaa mee g'anyi gbaru mgba l'ọdu-biribiri kẹ Kéreshi.

Ọdu-biribiri ọphu dụ l'iphu

¹⁸Iphe, doru mu ẹnya bụ l'iphe-ẹhuka ọwana, anyi eje nta-a ta asukpoda nù g'ee-wota iya atụ eyeru ẹgube ọdu-biribiri, Chileke e-mechaa dobe anyi. ¹⁹Iphemiphe, Chileke meru ememe bẹ ọnma anmanma l'ẹhu g'ẹphe hūma teke Chileke e-goshi unwu iya l'ọdu-biribiri ono. ²⁰Kẹle iphemiphe ono, Chileke meru ememe ono bẹ Chileke tūru ọnu g'ọ tūko bụru iphe, laru l'iswi. Ebe ọ bukwa iphemiphe, Chileke meru ememe meru iphe-ẹji k'onwiya. Ọ kwa iphe, tso ikpe, Chileke nmaru nemadzu lẹ nemadzu mesweru. Ọle Chileke mekwarupho g'iphemiphe ono, o meru ememe ono lekwapho ẹnya ²¹l'ujiku lanu bẹ ya a-goshi ọnu ono, ọ tūru iya sù g'ọ rekashihu ono. Ọogbe teke ono mee g'iphemiphe ta abūheru ohu iphe-ẹji; g'ọ bahu-chia l'ọdu-biribiri k'unwu yẹbe Chileke. ²²Iphe, anyi maru bụ l'iphemiphe, Chileke meru ememe l'atsugbaa ude iphe-ẹhuka gẹ nwanyi, ime eme; mbukwa byasu nta-a. ²³Ọle ọ tọ bulekwaa pẹ-a kpurumu. Anyibedua l'onwanyi, bụ ndu nwewaru Unme Chileke; mbu Unme, Chileke yeru anyi l'ẹhu gude goshi lẹ ya e-mechaa meeru anyi iphe ono, o kweru anyi ukwe iya ono; l'atsukwapho ude; g'anyi ele ẹnya gẹ Chileke mee anyi g'anyi bụru unwu iya, g'ọ gbata ogwehu anyi l'ophu. ²⁴Kẹle a dzotawaru anyi; ọ bụru iya bụ iphe, anyi elekwadu ẹnya teke oo-dzu oke. Kẹle ọ -buru lẹ nemadzu natawara iphe, oole ẹnya iya; ?o lekwadu ẹnya iya kẹ gūnu ọzobaa? ²⁵Teke anyi teke anatadu iphe, anyi ele ẹnya iya; ọo ya bụ; anyi ata nshi nọdunupho ele ẹnya iphe obu.

²⁶Nokwapho gẹ Unme Chileke anọduje eyeru anyi ẹka; kẹle ike ta adudu anyi; teme ebe ọ budu l'anyi maru g'e pfuje anu Chileke g'ọ gbaru anyi. Ọo ya bụ l'ọo Unme-dụ-Nsọ l'onwiya egudeje atsụ ude ọphu buẹpho yẹbedua maru iphe, o pfuru epfu anuru anyi Chileke. ²⁷Ọo Chileke, bụ yẹbedua, l'enyoje ime obu nemadzu bẹ mawaru iphe, bụ uche kẹ Unme-dụ-Nsọ; kẹle Unme-dụ-Nsọ anọduje epfu anu Chileke l'iswi ẹhu ndu-nso lẹ g'ọ dū Chileke ree.

²⁸Anyi maru l'iphemiphe, eme l'èhu ndu yeru Chileke obu anọduje emekọta g'ọo-duru phẹ lẹ ree; mbụ ndu Chileke kuru g'ọ tūberu. ²⁹Kẹle Chileke mahawarụ ndu nkiya teme mgboko dū; bya ahọtahawaa phẹ g'ẹphe buru ndu a-dū gẹ Nwa iya dū; gẹ Nwa iya ono buru ogerenya mẹ a -gụjekwanu unwanna iya l'ophu. ³⁰Oo ndu Chileke hotahawaru bẹ o kuru. O buru ndu ono, o kuru ono bẹ o guru lẹ ndu p̄fuberekoto. O buru ndu ono, o guru lẹ ndu p̄fuberekoto ono bẹ o dobewaru l'odu-biribiri iya.

N-yemobu Chileke l'èhu ndu kẹ Kéreshi

³¹?Bụ onu gụnu bẹ anyi e-yebaa l'iphemiphe ono nta? O -buru lẹ Chileke agbaru anyi ọdzori; ?bụ onye sūru g'oo-me anyi gūnu? ³²Mbụ onye ono te sephuduru Nwa iya azụ; obenu l'ọ gbẹchia duru iya ye g'ọ bya anwūhu-chiru anyi g'anyi ha. ?Bụ ẹgube iphe gūnu bẹ o tọo gbẹdu Nwa iya ono l'ẹka nū anyi kẹ mmanu? ³³?Bụ onye sūru eku ndu Chileke hotaru ikpe? L'ẹka o gbẹ bụwaru Chileke l'onwiya meru g'ikpe kalẹru phẹ. ³⁴?Bụ onye bẹ sūru phẹ anma ikpe? Oo kwa Kéreshi Jizọsu l'onwiya bụ onye gude iswi ẹhu phẹ nwūhu. Ophu o buledaa ono kpeekpu; ophu kachaakponu bụ l'o shi l'onwu teta dzuru ndzụ je anọdu l'ẹkutara Chileke epfu anuru anyi Chileke. ³⁵?O dukpooru iphe, sūru akposhi gẹ Kéreshi te eyehe anyi obu? ?Bụ eje iphe-ẹhuka; tọo oke mkpa; tọo mkpawere; tọo ẹgu ememe; tọo ta ahuma iphe, gagbobe l'upfu? ?tọo iphe, alọ ishi onwonye alọlo? ?Tọo l'ẹgbugburu anyi lẹ mma sūru iya ememe? ³⁶O dūa g'iphe, e deru sū:

“Oo l'iswi ẹhu ngu bẹ o tọ

dudu teke

onwu ta anọdujedu

eme g'o gbua anyi

mbọku-mbọku.

Aanọduje eme anyi g'aturu,

a chitaru eje egbushi.”

³⁷O tọ dukpoda; noo l'iphemiphe ono e-mekota; ọle anyi eshije l'ẹka onye ono, yeru anyi obu onoya kakota iya ike; mekpee ya. ³⁸L'ophu doru mu ẹnya bụ l'anwūhu; ọzoo ndzụ; ọzoo ndu ojozi-imigwe; ọzoo ndu ọchi-ọha imigwe; ọzoo ndu ọkpehu dū; ọzoo iphe, dū nta; mẹ ophu e-mechaa dū nū; ³⁹ọzoo igwe; ọzoo alị; ọzokpoo iphemiphe ọzo, Chileke meru ememe; ta adudu ophu sūru akposhi gẹ Chileke te eyehe anyi obu ophu, o shi l'ẹka Nnajiuphu anyi, bụ Kéreshi Jizọsu yee anyi.

Chileke lẹ ndu o hotaru

9 ¹Iphe, mu epfu bụ ọkpobe-opfu. Mu bụ onye kẹ Kéreshi; ẹbe mu adzudu ọka. Unme-dū-Nsọ bu mu ebubu l'ime obu bya emeje g'obu

^c 8:36 Gūnaa Ebvu 44:22.

mu marwetaję iphe, gbaru iya nų. O bųru obu mu ono meru g'o doo mu ęnya lę mu ta adzųdu ųka. ²Aphų ejije mu obu. Ebe ọ dųdu teke ọ tọ nọdujedu atsų mu l'ęhu; k'ophu oorwujechaa mu l'anų mee ³Qoduje mu g'a sų lę mu bų onye a tųru ọnu; ọphu mu lę Kęreshi atųgbaeduru; mę ọ -bųru l'ọo iphe ono a-dzọ ndu anyi lę phę bų mee lanų; ⁴bų iya bų ųnwu Ízurelu. Ephembedua bę Chileke họtaru g'ęphe bųru ųnwu iya. O bųru phę bę ọ goshiru ọdu-biribiri iya; ęphe l'iya nọdu l'ogbandzu, ukwe-iphe tso. O goshi phę g'a-abajeru iya ęja. ⁵Ephe bų awa ndiche anyi phę; tẹme Kęreshi l'onwiya bųru eri phę; mę a -bya l'abubu, ọ bų nemadzų. G'e tuje Chileke, kangokọtaru iphemiphe ępha jasų lę tuutuutuu lę mįimiimii. Nokwa g'ọ dų.

⁶Sų-a; ębe ọ bukwanu kę g'a sų l'iphe ono, Chileke pfuru ono bųwaa iphe-mmanų; kele ọ tọ bųgbabekwa ndu shi lę Ízurelu bų ọkpobe ndu Ízurelu. ⁷Ọphu g'ęphe ha abuebedu ọkpobe ųnwu Ébirihamu opfu l'ęphe bų awa iya. O kwa g'ọ dųchia baa: "Oo ndu shi l'ọkpa Áyizaku bę bų ndu a-bųru ųnwu ngu kpųrumu." ⁸Iphe, iphe ono egoshi bų l'ọ tọ bųdu iphe, bų ndu a nwųru anwųnwu mmanų bę bų ųnwu Chileke. Oo ndu Chileke kweru Ébirihamu ukwe l'ọo-nwuta bų ndu aagu eye l'ọkpobe ųnwu Ébirihamu. ⁹Lę gę Chileke gude kwe Ébirihamu ukwe-iphe ono bų l'ọ sųru iya: "Egube nta apha ọzo bę mu a-bya agbaphee ngu; Sera anwuta nwa nwoke."

¹⁰Ebe ọ bųledaa ono kpųrumu; ųnwu Ribeka tųkokwa shi lę nna lanų, bų Áyizaku, bų iya bų nna anyi kę ndiche. ¹¹Mbųro teke eteke anwudu ųnwegirima labọ ono; ọphu ęphe eke emedu iphe, dų ree; ọzoo iphe, dų ęji bę ọ pfuru opfu ęhu phę; k'ophu iphe, Chileke tųberu e-me; lę k'ahọta, ọ họtaru ndu nkiya, l'ębe abų l'ęphe meru ree; ọzoo l'ęphe meru ęji. ¹²O bųru iya meru g'o gude a sų Ribeka: "Oo onye k'ọgerenya e-mechaa ęjeru onye kę nwata ozi." ¹³Bų iya bų iphe, e deru sų: "Jiékoðu bę mu yeru obu; Iso dųkwanu mu ashį."

¹⁴?Dęnu g'anyi e-ye iya ọnu nta? ?Anyi a-sų lę Chileke te emeduru iphe, pfuru ọto tọ? Tųswekwa! ¹⁵Kele ọ sųru Mosisu: "O -dųru onye ọ dų mu gę mu phųaru obu-imemini; mu aphųaru iya ya. Teke ọ dųru onye ọ dų mu gę mu doberu obu-ọma; mu edoberu iya ya." ¹⁶Oo ya bų l'ọ tọ bųdu uche nemadzų; ọzoo iphe, eeme l'ęka; ọo Chileke aphųje obu-imemini. ¹⁷Kele ękwo-opfu Chileke pfukwaru sų lę Chileke sųru Fero: "Iphe, mu gude mee ngu eze ta adųkwa iphe ọzo, ọ bų; gbahaa gę mu egude ngu goshi g'ike mu ha; wafųa gę ndiphe mgburugburu eshi nno maru onye mu bų." ¹⁸Oo ya bų lę Chileke bų onye ọ dų iya g'ọ phųaru obu-imemini bę ọ phųjeru iya; ọ nọdu akpo-chije obu onye dų iya g'ọ kpo-chia ya.

Ehu-ęghu mę obu-imemini kę Chileke

¹⁹Ii-sųkwa mu rọ: O -bųru l'ọ dų ęgube ono ?bųhunu gųnu meru g'o gude Chileke nọdu anọdujekwapho ata nemadzų ųta? Chileke -gbę tųbewaa

l'oo ɔwa-a iphe, ya e-me; ?bụ onye sūru akpōshi iphe, Chileke tūberu lẹ ya e-me? ²⁰ Ọlẹ gūbe nwa nemadzū ọphu a-sū l'iphe, Chileke meru ta adūdu ree; ?l̩ bụ gūnu? ?Iphe, a kpūru l'ūrwa, ọojije onye kpūru iya nū sū: “?Ọ nwūru ịnwagha bẹ o gude ị kpūa mu g'ị kpūru mu-a?” ²¹ ?Tōbudu ọ-kpū-ite maru g'oo-me ūrwa iya? Ọ -dū iya g'o gude uzi ūrwa lanū kpūa ite labo gẹ nanū būru ite, e meru ọna; ọphuu abūru ite, e medūru ọna; ?tōo kpūdu iya?

²² ?l̩-sukwanu agha mẹ ọ -būru l'oo Chileke eme egube ono? Ọ dūru ndu Chileke meru gẹ ya gude goshi oke-ẹhu-eghu iya; waa g'ike iya beru. A makwarū-a lẹ ndu ono gbawaru g'o gege egude oke-ẹhu-eghu iya mebyia p̩hẹ; ọlẹ ọotarū p̩hẹ nshi shii. ²³ Ọ dukwanuru ndu ọphu Chileke gude eme gẹ ya goshi l'odu-biribiri iya te nwedu ẹtu. Ndu k'ono bẹ ọ phūru obu-imemini, bụ iya bụ ndu ono, ọ tūbehawaru lẹ yẹlẹ ẹphe a-gbaru l'odu-biribiri iya ono. ²⁴ Ọ būru anyibe ndu k'ono, o shi lẹ ndu Jiu mẹ ndu abūdu ndu Jiu kua ono bẹ ọ phūru obu-imemini ono. ²⁵ Ọ būru iphe ono bẹ o pfuru l'ekwo Hosiya sū:

“Ndu eshidu būru ndibe mu
bẹ mu e-mechaa kua
ndibe mu.

Ọha ono, mu eshidu yee obu
ono bẹ mu e-mechaa
kua ndu mu yeru obu.

²⁶ Teme ọ būru l'echilabo ẹka
ono,
e shi sū p̩hẹ l'ẹphe ta
abūdu ndu kẹ Chileke
bẹ aa-nodu kua p̩hẹ
unwu Chileke;
mbū Chileke nọ ndzū.^d”

²⁷ Teme Azáya chikwaapho mkpu ẹhu ndu Ízurelu sū: “Unwu Ízurelu -hakupoo mẹ obeta ẹphe je l'aha g'ẹja, kuru l'enyimu; ọ kwapho nwa ndu ọphu abadu ishi bẹ aa-dzota. ²⁸ Noo kele Nnajiuphu e-mekota iphemiphe, o pfuru ndiphe. Oo-mechachaa ya egwegwa; mee ya rengurengu g'oo-du.” ²⁹ Ọ dūhukwaa g'iphe, Azáya pfuhawaruro teme o mee sū: “Ọ tō bụ lẹ Chipfu, bụ Ọkalibe-Kakota-Ike te ekwedū g'awa anyi bvuebe mẹ anyi abvū gẹ Sodomu; mbū mẹ o mee anyi iphe, o meru Gómóra.”

Upfu, adū ndu Ízurelu l'okpa

³⁰ Nta-a ?bụ awe bẹ anyi a-subekwanu iya ishi? Ndu ono, abūdu ndu Jiu ono, eshidu kukebe ẹhu eme g'a gūa p̩hẹ lẹ ndu p̩fuberekoto ono;

^d 9:26 Gūnaa Hos 1:10.

bụakwaa ndu p̄f̄uberekoto; ƙe ƙe eƙe kwetarū. ³¹Obenu ƙe ndu ƙzure ƙu, bu ndu kukeberu ƙhu eme g'a gūa p̄he ƙe ndu p̄f̄uberekoto ono; ta adūƙwa ike buru ndu p̄f̄uberekoto. ³²?Ɔ buru gūnu ƙparū iya? Ɔo ƙe eƙe te egudedu ekweta ƙoƙo ya; ƙ gbe buru iphe, eƙe gude ike k'eka p̄he meta; opfu l'ephe eme iphe, ekemu pfuru be eƙe gude ƙoƙo ya. Eƙe jenu evu-kota oke mƙpuma ono daa iko. ³³Ɔ buru iya bu iphe, e deru su:

“Unu hūmakpodapho!

Mu woakwaru
mƙpuma,
a-ƙoƙo adū ndiphe upfu
toƙbo ƙe Zayonu;
mbū mƙpuma eƙe
e-vukota daa iko.

Ɔphu onye ƙweru nƙiya
abyadū akwa izimanū.”^e

10 ¹Ūnwunna mu; iphe, dukpoo mu ree l'obu; teme ƙ buru iphe, mu aƙoƙoƙe epfu aƙ Chileke g'o meeru iya ndu ƙzure ƙu bu g'o mee g'a dzoo p̄he. ²L'ophu mu makpooƙo bu l'ophu p̄he aphuphu l'ehu emeje uche Chileke; ƙe eƙe te egudedu mmamiphe eme iya. ³L'eshinu eƙe amadu k'apf̄ubekoto ophu shi Chileke l'eka; eƙe gbe aƙo apf̄ubekoto k'eka p̄he; be eƙe shi nno j̄ika eworu onwophe de e l'apf̄ubekoto ke Chileke. ⁴Ƙe Kereshi meakwaru g'ekemu ta abuhe ūzo, Chileke shi agu nemadzu l'onye p̄f̄uberekoto; g'iphe, dukpoo onye ƙweru ke Kereshi buru onye Chileke a-gu l'onye p̄f̄uberekoto.

Ndzota bu ke ndu ke Kereshi

⁵Wakwa ge Mosisu deru k'apf̄ubekoto ophu shi l'ekemu baa: “Onye eme iphemiphe ono bukwa iya be oo-gude ƙoƙo ndzu.” ⁶Obenu l'o waa iphe, e deru ƙe k'apf̄ubekoto ophu shi l'ekweta baa: “Ta adūƙwa teke ii-je ari su: ?Bu onye a-du ike laa l'imigwe.” Mbū je ekuzeta Kereshi. ⁷Ɔzo; “?Bu onye l'e-nyiba l'al̄i-maa?” Mbū je ekufuta Kereshi. ⁸?Bu gūnu be eepfukwanu? “Opfu Chileke ƙoƙwa ngu ntse. Ɔ kwa iya bu opfu, iikpu l'onu; bya aburu iya bu iphe, ƙo ngu l'egomunggo.” Ɔo ya be bu ozi-oma ono, anyi ezi onoya, bu iya bu opfu k'ekweta-a. ⁹Teke ƙ bu l'i gude onu ngu pfua ya hoo haa l'oo Jizosu bu Nnajiuphu obu; bya egude ƙpoma ngu g'o ha kweta ƙe Chileke meru iya; o shi l'onwu teta dzuru ndzu; l'a dzoo ngu. ¹⁰Onye gude obu iya g'o ha kweta; Chileke agua ya l'onye p̄f̄uberekoto; ƙ buru onu be eegudeje pfua ke Kereshi hoo haa; l'adzo onye obu. ¹¹L'e ƙwaru l'ekwo-opfu Chileke su: “Onyemonye, woru onwiya ye iya l'eka be iphere tee mekwa.” ¹²Ɔ to dukwa mƙpocha, du nu. L'onye pho bu onye

^e 9:33 Gūnaa Azá 28:16.

Jiu; onye ọphuu buru onye Gurisu ta aduekwa; kele ọ bụhukwapho Nnajiuphu lanu ono bu Nnajiuphu phe g'ephe ha. O nodu emeru iphe, bukpoonu epfuje anu iya nu eze-iphe-oma, paru aka apaa. ¹³Kele "o kwa iphe, bukpoonu onye leku epha Nnajiuphu be aa-dzota."

¹⁴?Denu g'ephe e-shikwanu eku epha iya m'ephe ekwetaduru nkiya? Temu ?denu g'ephe e-shi kweta k'onye ephe teke anumaswee nkiya? ?Denukwanu g'ephe e-shi numa iphe, adudu onye pfuru phe iya nu?

¹⁵?Denukwanu ge ndu-ozima e-shi je ezi ozima; lebe abụ le ziru phe g'ephe je? O buru iya bu iphe, e deru su: "Lenu iphe, okpa phe ama; mbu okpa ndu ezi ozima ke nchi adu doo; teme ephe nodu ezi iphe, du ree." ¹⁶Ole o to bubedu g'ephe ha be meru iphe, ozima ono pfuru. Kele Azaya pfukwaru su: "Nnajiuphu ?buhunu onye be kweru kweta iphe, o numaru anyi l'onu?" ¹⁷Oo ya bu lekweta shi lanuma iphe. Iphe, anuma bukwanuru Opfu Chileke.

¹⁸Ole ge mu jieshikwa: ?Bu anuma be ephe ta anumaduru ozima obu to? Waawakwa! Ephe numachacharu iya-a!

"A numa-dzukwaru olu phe

lekameka leliphe.

Mbu l'opfu phe ngakotaru

eliphe jasụ

leka igwe beru;

ali beru.^f"

¹⁹Mu byakwa aja su: ?Bu enya be ozima ono eshidu doo ndu Izurelu to? Le Mosisu vuhaakwaru uzo yee ya onu su:

"Mu e-gude oha, abudu

okpobe oha

meru okophoo ye unu lehu.

Mu e-gude oha, eme eswe

kpatsu unu ehu-eghu.^g"

²⁰Temu Azaya kabakwaa ya ro epfushi ike su:

"O kwa ndu te eshidu acho

mu nu be humaru mu

nu.

O buru ndu te eshidu aji aji

mu be mu goshiru

onwomu.^h"

²¹O byakwanu lehu ndu Izurelu; o su: "O to dudu teke mu ta amachijedu aka ge mu heta ndu ono, bu ndu kwefuru mu ike ono; mbu ndu ejo-okpoma ono; g'ephe dakobe lwaphuta azu lwafuta mu.ⁱ"

^f 10:18 Gūnaa Ebvū 19:4. ^g 10:19 Gūnaa Dit 32:21. ^h 10:20 Gūnaa Azá 65:1.

ⁱ 10:21 Gūnaa Azá 65:2.

Obu-imemini, Chileke aphuru ndu Ízurelu

11 ¹Mu byakwa ajia ozo su: ?Bu ajika be Chileke jikawaru ndu nkiya to? Tuswekwa! Mbedua l'onwomu bukwa-a onye Ízurelu. Mu bu oshilokpa Ébirihamu; bya aburu onye okpa-ipfu Benjiaminu. ²Chileke ta ajikakwaru ndu nkiya, bu ndu o vuru uzo mahawaru. ?Unu ta amadu iphe, ekwo-opfu Chileke pfuru; mbu ge Elayijia gude chia Chileke ichi ndu Ízurelu su: ³“Nnajiuphu; ephe tukoakwaru ndu mpfuchiru nkengu gbuebe; bya enwukposhia oru-ngweja ngu. O buwaru mbedua phoduru kpoloko; ephe nodu emekwapho g'ephe gbua mu.” ⁴Ole, ?Bukwanu gunu be Chileke pfuru iya? O suru iya: “Mu dobekwaru iphe, ha g'unu nemadzu iri lesaa l'umadzu ukporo iri, bu ndu teke ewosweeru ikpere gbuaru Balu l'ali.” ⁵Nokwapho g'o du nta. O dukwaru-a nwa ndu Chileke gudepho k'eze-iphe-oma, oome haru hota. ⁶Teke o bukwanu l'oo eze-iphe-oma be e gude hota phe; o n'iya-a bu l'o to buedu iphe, e setaru l'akanya; odumeka be eze-iphe-oma ta abuekwa eze-iphe-oma. Teke o bukwanu l'oo iphe, e setaru l'akanya; o n'iya-a bu l'o to buedu eze-iphe-oma; odumeka be akanya ta abuekwa akanya.

⁷Su-a; ?bu awe be anyi a-sube opfu obu ishi nta-a? O to bubekwa ndu Ízurelu l'ophu nataru iphe, ephe riru aphu iya; o kwa ndu a hotaru nataru iya. Ndu ophuu bukotaru ndu a kpo-chiru okpoma. ⁸O buru iya bu iphe, e deru lekwo-opfu Chileke su: “Chileke nuakwaru phe maa meru mgbenya nodu erwe phe. Ephe te egudeedu enya aphu uzo; ophu ephe anumajeedu iphe le nchi byasu ntanu-a.” ⁹Temé Dévidi pfukwaapho su:

“Ge nri, ephe eri eriri
bukwaru phe
onyà-enu
yele onyà-anu,
ephe a-nmalahu.

L'o buru upfu du phe l'okpa;
g'e gude iya gwata phe
ugwo iphe, ephe meru.

¹⁰G'enya gbahukwa phe ochii
g'o to du iphe,
ephe a-huma.

G'apfu hufukwa phe bukilii
jasu l'ojejejo.”

¹¹Mu byakwa ajia ozo su: ?okpa kabé tsua ndu Ízurelu ntsu k'ophu ephe darwuwaru ali; ebe ephe agbalihubaedu to? Tuswekwa! Ochikwa l'okpa, tsuru phe ntsu ono meru g'o gude ndzota rwube ndu ohozo; geeshikwanu egube ono ge ndu Ízurelu awata phe ekoru okophoo. ¹²L'eshinu o bu emeswe, ndu Jiu mesweru meru g'o gude urwu kwata gbaaru ndiphe

mgburugburu. Uburu, butaru ndu Jiu mekwaapho g'urwu kwata gbaaru ndu abudu ndu Jiu. Mbụ l'urwu a-kwatakwa kabaanụ shii okpobe akaka mę ndu İzurelu g'ephę ha lwaphuta azu İwapfuta Chileke.

Ndzota ke ndu abudu ndu Jiu

¹³Nta-a bukwa unube ndu abudu ndu Jiu be mu epfu eyeru. Su-a; eshi-nu mu bu onye-ishi-ozu ke ndu abudu ndu Jiu; be mu gudekwa ozi ono eku onwomu. ¹⁴K'ophu bu; g'o duhabe; mu egudeje iya eme ge ndu ali mu ono awataru unu ekoru okophoo; ge mu eshi nno haru phe dzoo.

¹⁵L'o -buru teke epehe jikaru Chileke be Chileke gbę mee ge yele ndiphe bya adu le ree; ?bu gunu e-mekwanu me Chileke natae phe pho ozo? Ndu nwuhuru anwuhu a-gbeshikwa dzuru ndu ozo.

¹⁶L'o -buru le mebyi-ipe-mbu ono du nso; be mkpukorophu iya dukotanaa nso. O -buru l'ogbarabvu-oshi du nso be ekali iya l'ophu dukotaakwapho nso.

¹⁷Su-a; ndu Jiu du g'oshi olivu unuphu, a haru ekali iya kwashia. Unubedua, abudu ndu Jiu buru ekali-oshi olivu egu, e wotaru bya edepfube l'eka a kwafuru ekali k'unuphu pho. E depfube iya; o dzuru ndu. Nta-a be unu shiwa l'ogbarabvu olivu unuphu pho amitaje mini gude nodu ndu. ¹⁸Oo ya bu le-a; te ejekwa asu l'o to dudu iphe, ekali iya ophu a kwashiru pho bu. ?Bu ke gunu be ii-gude eku onwongu? Nyatakwa l'o to budu ngu gudeshi ogbarabvu-oshi ono; l'o chia ogbarabvu-oshi ono gudeshi ngu.

¹⁹Ii-gbenu su: "A kwafuakwaru ekali-oshi ono; g'e depfube mbedua." ²⁰Ole makwaru l'ipe, kparu iphe, e gude kwashia ya bukwa l'o to woduru onwiya ye Kereshi l'eka. Gubedua nyikatakwanu pfuru pfushia ike; kele i kwetaru. Oo ya bu le-a; te etsenupho etsetse; ge ndu gujekwa ngu. ²¹Eshinu Chileke ahaduru okpobe ekali-oshi ono ke mmanu; ?bu-chia gubedua be oo-ha ke mmanu? ²²Nowaro g'ii-gude huma le Chileke emeje odoo; humakwapho l'ooomeje nemadzu iphe kpangangaa. O meru ndu jikaru iya nu iphe kpangangaa. O mekwanaaru gubedua odoo; mbukwa me o -buru l'i kweru nopyabe l'odoo obu, oomeru ngu; odumeka be o kwafujekwa ngu pho. ²³Teke o bu le ndu ke Jiu jika-buhuru eze-ipe-oma ke Chileke be Chileke e-wolekwaru phe-a dophu azu l'eka epehe shi nodu; kele Chileke a-dukwa ike dophu phe azu l'eka epehe shi nodu. ²⁴Oo ya bu le-a; o -buru l'a kwafuru ngu l'oshi olivu-egu ono; bya eworu ngu depfube l'oshi olivu-unuphu pho; mbu o buru iphe, e meru g'e te emejedu iphe; ndu owa-a, bukwanu phe bu ekali-oshi olivu-unuphu ono gedegede be oo-kabakwanu Chileke nphe eworu ekali iya, o shi kwafu akwafu pho woru depfube l'oshi, ekali iya ono shi nodu.

Obu-imemini Chileke l'ehu onyemonye

²⁵Unwunna mu; o nweru okpobe-opfu, e domiru edomi, mu eme g'unu maru; g'unu ete ejeduru ari l'unu manukawaru iphe. Iphe, unu a-maru bu

lẹ-a; ọ tọ bụkwa gẹ ndu Ízurelụ bụ ẹjo-ọkpoma nta-a bụ g'ẹphe a-dụwaro jeaduru. Teke ẹjo-ọkpoma phẹ ono a-nọ-beru bụkwa teke ndu abudu ndu Jiu, Chileke hotaru l'a-tukowa lwaphutawa azu byapfuta iya. ²⁶Ọo ya bụ; teke ono; aa-tuko iphe, bụ Ízurelụ mgburugburu dzoo, bụ iya bụ iphe, e deru l'ekwo-opfu Chileke sụ:

“Onye-Ndzota e-shi lẹ Zayonu
bya.

Ọo-tuko ẹjo ememe,
unwu Jiékọpu
shi eme wofukota phẹ
l'ehu.

²⁷Kele ọwa-a bụkwa ọgbandzu,
e-shi mu l'eka laaru
phẹ teke ono,
mu a-gukotaru phẹ nvu
l'iphe-ẹji,
ẹphe mekotaru ono.^j”

²⁸A -bya lẹ k'ozì-oma ono bẹ ọ gbekwa buru iphe kweru unu l'ẹphe bụ ọhogu Chileke. Obenu l'a -bya lẹ k'ahota, Chileke hotaru ndu Jiu bẹ ẹphe bükwanu ndu Chileke yeru obu l'opfu ẹhu ndiche anyi phẹ. ²⁹Lẹ Chileke ta agbanwejekwa iphe, ọ rihawaru k'ememe l'ehu ndu ọ hotaru g'ẹphe buru ndu nkiya. ³⁰L'unubẹ ndu abudu ndu Jiu shi buru ndu te kwejedu eme iphe, Chileke pfuru; obenu lẹ nta-a bẹ Chileke phuru unu obu-imemini opfu lẹ ndu Jiu te ekwejedu eme iphe, o pfuru. ³¹Nokwapho g'ọ dọ ndu Jiu bụ ono. Nta-a bẹ ẹphe te ekwekwapho eme iphe, Chileke pfuru g'ee-shi gẹ Chileke aphuru phẹ obu-imemini g'ọ phuru unu. ³²Ọo ya bụ lẹ Chileke haru onyemonye ọzo g'ẹphe te ekweshi eme iphe, o pfuru gẹ ya a-phuru onyemonye obu-imemini.

Ọdu-biribiri Chileke

³³Ha-oo! nkwa menya yele mmamiphe kẹ Chileke pakwaru omilomi. Ikpe, ookpeje ta adukwa onye suru iya ama ẹberu; ẹbe ọ dukwa onye suru amakotaru g'o meje iphe iya. ³⁴“?Bụ onye maru uche Nnajiuphu? ?Bụ onye egoshije iya iphe, ọo-noduje eme? ³⁵?Bụ onye nujeru iya iphe; k'ophu ọo-su g'ọ pfukwaa ya ugwo iphe iya?” ³⁶Ọo ya meru iphemiphe. Ọ buru iya bẹ iphemiphe shi l'eka iya dọ; ọ bükwaru iya pho bẹ iphemiphe, dọ dọ-doru. G'ajaja buru kẹ Chileke jasụ lẹ tuutuutu lẹ mimiimii. Nokwa g'ọ dọ.

Adzuru ndzụ je ozi Chileke

12 ¹Ọo ya bụ; unwunna mu; eshinu Chileke aphuru anyi obu-imemini nno bẹ mu arwo unu sụ g'unu woru onwunu nu

Chileke ɔkpobe anunu; unu buru iphe, dzu ndzu, unu gude gweeru Chileke ngweja, du nsɔ bya aburu ophu Chileke nataru. Noo iphe, bu ɔkpobe abaru Chileke eja bu onoya, bu iphe, gbaru iya nu. ²Unu te ekwekwa eme g'unwu-eliphe anɔduje eme. Iphe, unu e-mechia bu g'unu haaru Chileke onwunu g'o buru iya l'a-nɔduje agbanwe obu unu; g'uche unu buru iphe ophuú g'unu a-duje ike maru iphe, bu uche Chileke, bu iya bu iphe, du iya ree; buru iphe, o nataru bya aburu iphe, duɓe ree.

³Iphe, mu gude epfuru unu iphe-a, mu abya epfufu-a bukwa le Chileke mewaru mu eze-iphe-oma; mu nɔdu epfuru iya unu g'unu ha su g'unu ta arijekwaru onwunu g'unu ahadu. O chia iphe, unu e-meje bu g'unu deje enya le mini maru iphe, unu ari. Chileke hɛwaru onyemonye oke iphe-oma, shi lekwekwe, onye kweru nkiya. Noo iphe, e-goshije onyemonye iphe, oo-nɔdu ariru onwiya bu ono. ⁴L'o kwa g'o du l'ehu nemadzu bu ono; logwehu lanu enwejekwaru mpufukashi, du igwerigwe; mbu ephe nɔdu atukoje emegbaa iphe, du iche iche. ⁵Nokwapho g'anyi du igwerigwe; o le anyi shiwaa latugba, anyi le Kereshi tugbaru buru ogwehu lanu. Onyenonu loome ge ye le nwibe iya dogba ehu. ⁶Anyi nwegbaarú iphe-oma, Chileke meru nu anyi l'ehu l'ehu; onye g'eze-iphe-oma nkiya ha. Nta-a bu g'anyi gudeje iya mee iphe, g'o gbaru. O buru mpfuchiru, g'onye ono pfujekwa iya g'o goshiru iya ya lekwekwe, o kweru. ⁷Teke o bu onye Chileke meru iphe-oma k'eje ozi; g'onye obu yeru ehu leje ozi. Teke o bu ezi iphe; g'onye obu zijekwa iphe. ⁸Teke o bu adu obu; g'onye obu nɔduekwapho l'adu nemadzu obu. Teke o bu l'anu iphe; g'onye ono sajekwa eka asasa nu iya. G'onye no l'ishi kukebejekwa ehu jeshi ozi ike; g'onye aphu obu-imemini phujekwa iya l'ehu-utso.

N-yemobu

⁹Ge n-yemobu i yeru nemadzu ta abukwaru l'eregede. Kpajeru iphe-eji l'aphara; gudeshia eka l'eme iphe, du ree. ¹⁰G'onyenonu yeje nwibe iya obu mebyi eyeye gude goshi l'unu tukoru buru unwunna lanu. G'onyenonu kajekwa akwabɛ nwibe iya ubvu eme lonwiya. ¹¹Jeshijekwa ozi ike; te emejekwa enyiru. Hakwaa ge Unme-du-Nsɔ meje ngu ire l'ehu; shi egube ono mee g'ejeru Nnajiuphu ozi e-vuje ngu evuvu l'obu. ¹²G'iphe ono, unu ele enya iya ono meje g'ehu tso unu utso. Unu atakwapho nshi me unu -nɔdu eje iphe-ehuka. Unu epfu anu Chileke mkpurumkpuru. ¹³Unu yejeru nwibe unu, unu l'ephe tukoru buru ndu ke Chileke eka le mkpa, duru phe nu. Unu ekukebeje ehu kwaa ebyaa, byaru unu.

¹⁴Unu gojeru onu-oma nu ndu eme unu mkpawere. Mbu-a unu gojekwa onu-oma; unu ta atujekwa nemadzu onu. ¹⁵Ndu ozo -nɔdu ete eswa; unu tsojekwaru phe tee eswa; ndu ozo -nɔdu ara ekwa; unu tsokwaru phe raa ekwa. ¹⁶G'uche unu le nwibe unu bujekwaru nanu. Unu te edobejekwa

onwunu g'unu ahadụ. Ọ chia iphe, unu e-meje bụ g'unu lẹ ndu ọnya lwaru megbajẹ. Unu ta abujekwaru nwomaru-ọ-machata.

¹⁷Unu te egudejekwa ejo-iphe pfa nemadzụ ugwo ejo-iphe, o meru unu; gbahaa g'unu kukebeje ẹhu meje iphe, onyemonye a-maru l'ọo iphe, dū ree. ¹⁸Unu kukebe ẹhu seje g'unu l'onyemonye nọdu lẹ nchi-odoo; l'iphemiphe, unu eme; mę oo-je l'ekwe ememe. ¹⁹Ndu mu yeru obu; unu te emelatajekwa ugwo iphe, e meru unu. Unu hajekwa gę Chileke gude oke-ẹhu-eghu iya melata onye ono. Le dekwaru l'ekwo-opfu Chileke su: “Emelata bukwa mu bę ọ duru; ọ buru mu l'a-pfu ugwo.” Noo iphe, Nna-jiuphu eepfu. ²⁰Ọ chia iphe ii-meje bụ: “Ọ -buru l'onye opfu ngu bę ẹgu agu; nū iya nri. Teke ẹgu mini agu iya; kee ya mini g'ọ ngua; lẹ i -nọdu eme nno bę i kpọberu iya icheku-ọku l'ishi.” ²¹Te ekwejekwa g'ejo-iphe mekpee ngu; gudejechia iphe-oma mekpeje ejo-iphe.

Akwabę ndu-ishi ùbvù

13 ¹G'onyemonye mejekwa iphe, ndu-ishi phę suru g'e meje. L'ọ tọ dukwa onye byaru aburu ishi mę ọ -budu l'o shi l'eka Chileke; tẹme ọ buru Chileke bę yeru ndu ọphu bụ iya nū nta-a. ²L'onye jikaru eme iphe, ndu-ishi pfuru bukwa ndu-ishi, Chileke yeru bę onye ono jikaru. Ndu ajikakwanu phę nū buru ikpe bę ẹphe esekọ ekpu onwophę l'ishi. ³Lẹ ndu eme iphe, dū ree ta atsujekwa ndu-ishi ebvu. Ndu atsū ndu-ishi ebvu bukwa ndu eme ejo-iphe. Teke ọ bụ l'ọ dū ngu g'i b'atsujeshi ndu-ishi ebvu; ọ n'iya bụ g'i meje iphe, dū ree g'onye-ishi ajaa ngu ajaja. ⁴Kẹle onye-ishi ono bukwa onye-ozī Chileke; iphe, oome buru iphe, a-duru ngu lẹ ree. Ọle teke i mekwanuru iphe, adudu ree; tsukwaa ya ebvu; kẹle e te eyekwaru iya kę mmanu. Ọ bụ onye-ozī Chileke; buru onye ahù ndu eme ejo-iphe ahùhù gude egoshi oke-ẹhu-eghu kę Chileke. ⁵Noo g'ọ gude unu je l'emeje iphe, ndu-ishi pfuru; ọ tọ buledaa g'unu agbalaaru oke-ẹhu-eghu Chileke; obenu l'ọ bufukwaapho g'unu meje iphe, obu ta anmadu unu ikpe.

⁶Nokwapho iphe, meru g'ọ gude unu je apfuję akiriko. Noo kẹle ndu-ishi ono bụ Chileke bę ẹphe ejeru ozi; ẹphe nọdu anọduje eme g'ẹphe jee ya g'ọ gbaru. ⁷Unu mejeru phę iphe, rwuberu phę nū. Onye o rwuberu l'aturu akiriko nū; unu aturu iya nū iya; onye o rwuberu l'aturu utu nū; unu aturu utu nū iya; onye ọ gbaru l'eyeru nsọ; unu eyejeru iya nsọ; onye ọ gbaru l'akwabę ùbvù; unu akwabę iya ùbvù. Unu mejeru onyemonye iphe, rwuberu iya nū.

Eye nemadzụ ibe ngu obu

⁸G'ọ tọ dukwa ugwo, unu e-jijeru nemadzụ; gbahaa ugwo n-yemobu. Kẹle onye yeru nwibe iya obu mekotaakwaru iphe, ekemu suru g'e meje. ⁹Kẹle iphe, bukpo ekemu-a g'ọ hakotakpo, bụ iya bụ; te erikwa ogori;

ophu i gbukwa ochi; ophu i zikwa iphuru; ophu iphe, onye ozo agujekwa ngu; mewaro unwu ekemu ozo, yigbaa ya nu. Ekemu ono g'o hakotakpoo jeru asube ishi le: "Yee nemadzū ibe ngu obu g'i yeru onwongu." ¹⁰ Onye yeru nemadzū ibiya obu te emejekwa iya ejo-iphe. Noo g'o gude n-yemobu buru emeebe iphe, ekemu pfuru.

Akwakobe k'abyabya Kéreshi

¹¹ Su-a; iphe mefuaru g'o gude unu je atukoje iphemiphe ono eme bu ge nta-a gbaru; mbu l'o rruwaru teke unu e-shi le mgbenya tehu. Noo kele nta be ndzota anyi kawaa ntse eme le g'o shi du-be enya me a -gbel teke anyi beberu kweta ke Kéreshi. ¹² O dukwaa enya abali keru ebo; nchi aboju dukwaa ntse. Oo ya bu; unu g'anyi gwobenu iphe, eeme l'ochii; kwaa onwanyi ngwogu ophu anyi e-gude alwu ugu l'iphoro. ¹³ G'anyi meje okpobe umere, eme l'iphoro; anyi ahaa eme ke nwanji ozoo ke nwoke; haa angunuka mee. Anyi ahakwaapho emephe opfu; haa jiji-enya. ¹⁴ O chia iphe, unu e-meje bu g'unu tukokpoephe umere Nnajiuphu, bu Jizosu Kéreshi meje g'oha. Unu ta ahakwaru obu egube nemadzū, unu shi buru uzo; mbu k'ophu unu e-mejeephe ejo-iphe agu iya nu.

Anma nemadzū ikpe l'egomunggo

14 ¹ Onye ekwekwe iya du nyegenyege; unu hajekwa iya g'unu l'iya nodu. O l'oo g'unu l'iya te ejejekwa atu ego l'iphe, o suru l'oo owa-a g'o du iya bu owa. ² O duru ndu adudu iphe, ephe aso nso eriri; o bekwanu l'onye ophuu, ekwekwe iya dukwadu nyegenyege pho buepho iphe, oorije bu eba-ophe. ³ Oo ya bu; g'onye ono, ta adudu iphe, ooso nso pho ta akpokwanu onye ophuu ebo lafu l'o to ridu ge ya eri. Noo kele Chileke nataakwarupho yebedua. ⁴ ?I bu gunu? ke g'o buru onye ejeru onye ozo ozi be jiji-nodu agbarwushi. Oo Nnajiuphu iya be a-nma iya ikpe l'ooome eji; ozoo l'ooosu l'ooome ree. O bekwanu l'oo-nodu eme ree; kele Nnajiuphu suru g'oo-me iya g'o me ree.

⁵ O nweru onye a-hota eswe ujiku lanu dobe l'oo eswe ono kakota ndu ophuu mkpa; nweru onye a-ri su l'eswe ta adudu ophu ka nwibe iya mkpa. G'onyenonu pferupho l'ophu o pfuru pfushia ya ike. ⁶ Onye riru l'o nweru mboku ophu ka nwibe iya mkpa dobe iya iche; l'eme iya gude akwabé Nnajiuphu ubvu. Onye adudu mboku, duru iya le nso bukwarupho Chileke be oomeru iya. Onye adudu iphe, ooso nso eriri l'eri iya gude akwabé Nnajiuphu ubvu. Noo kele ookeleje Chileke ekele iya. Onye aso iphemiphe nso buru Nnajiuphu be oosoru iphemiphe nso; teme o nodu ekeleje Chileke ekele iya. ⁷ O to dukwa g'anyi ha; onye no ndzu no-doru onwiya; ophu o dukwa onye anwuhu anwuhu anwuhu-doru onwiya. ⁸ Anyi -dzuru ndzu; bu Nnajiuphu be anyi dzuru iya; teke anyi anwuhu anwuhu; o kwapho Nnajiuphu be anyi anwuhu alapfu. Oo ya bu l'anyi bu

kẹ Nnajiuphu: mẹ anyi nọ ndzụ; mẹ anyi anwụhu anwụhu. ⁹Kẹle Kéreshi nwụhuchaaru bya adzuru ndzụ ozo g'ọo-buru Nnajiuphu ndu nwụhuru anwụhu; mẹ kẹ ndu dzụ ndzụ. ¹⁰Sụ-a; ?denu g'o gude i nọdu agbarwushi nwanna ngu l'ime obu ngu? Ozo; ?o meru imagha bẹ o gude i nọdu akpo iya ẹbo l'afu? ?Tị madu lẹ g'anyi ha l'e-mechaa pfukotarua l'iphu Chileke; onye bụ iya l'e-kpekota anyi ikpe? ¹¹Noo l'e deru l'ekwo-opfu Chileke sụ:

“ Eshinu mu dzụ ndzụ;
 bẹ onyemonye
 e-mechakwaa gbuaru mu
 ikpere l'ali.
 Nokwa iphe, Chipfu eepfu.
 Onyemonye e-mechaa
 pfukota l'oo mu bụ
 Chileke.^k”

¹²Oo ya bụ lẹ g'anyi ha l'onye l'onye l'e-emecha nọdu l'iphu Chileke; doo edo onwiya.

Akwatsu nwibe ngu

¹³Oo ya bụ; g'anyi ta anọdujeshinu agbarwushi nwibe anyi. O chia g'anyi tuko tubua g'anyi ta abujeru upfu dū nwanna anyi l'okpa; ozo meta iphe, e-me g'o mee iphe-ẹji. ¹⁴Eshinu mu lẹ Nnajiuphu, bụ Jizosu tūgbaru buru nanu bẹ ophu dokpoo mu ẹnya okpobe edodo bụ l'o tọ dudu iphe, eeri eriri, mu asokwadu nsọ. Ole teke o bụ l'o nweru onye pfulu sụ l'iphe, dū ẹgube-a bẹ ya aso nsọ; oo ya bụ; iphe ono a-buru iphe, aso nsọ l'ehu onye ono kwa. ¹⁵Teke o bụ l'i gude k'iphe, iiri l'onu mee nwanna ngu; k'ophu ẹhu ebvuduru iya ebvuru; oo ya bụ l'i ti mehedu iphe, egoshi l'i yeru iya obu. Oo ya bụ; g'iphe, iiri l'onu ta akpatakwa ẹ nwanna ono, Kéreshi nwụhu-chiru onwu ono laa l'iswi. ¹⁶Te ekwekwa g'iphe, dū ree, iime vuta ẹjo ẹpha. ¹⁷L'iphe, bụ lẹ Chileke bụ eze ta abukwa l'iphe, eeri l'onu; ozo l'iphe, aangū angungu. O kwa apfubekoto; yele nchi-adu-doo; waa ẹhu-utso ophu shi l'eka Unme-du-Nso. ¹⁸Onye ẹjeru Kéreshi ozi ẹgube ono eme iphe, jiru Chileke ẹpho; bya emekwapho iphe, dū ndiphe ree.

¹⁹Oo ya bụ; g'anyi tūbeepho nvọ l'iphe ono, emeje ẹ nchi dū doo ono-ya; mbu iphe ono, l'a-nodu eme ẹ nwibe ngu pfushia ike l'ekwekwe, o kweru kẹ Chileke ono. ²⁰Te egudekwa k'iphe, iiri l'onu mebyia iphe, Chileke eme. Iphemiphe, eeri eriri, dūbekwa ree. O lẹ o tọ gbaduru ẹ nemadzū ria iphe, a-kpata ẹ nwibe iya mee ẹji. ²¹O kakwa ree g'i tị tashị anu; ophu i ngushi mee; ophu o dukpoo iphe, ii-je ememe, bụ iphe, a-buru upfu dū nwanna ngu l'okpa mee ya g'o daa; ozo mee ya g'o dū

^k 14:11 Gūnaa Azá 45:23.

nyegenyege. ²²G'iphe, bukpo iphe, i kweru bukwarupho iphe, duru gu le Chileke. Onye ehu atso utso bukwa onye meru iphe, o riru lo du ree ememe; ebe o dudu teke obu anma iya ikpe l'iphe, o meru. ²³Obenu l'onye abo obu ebo be ikpe nmakwaru me o -ria iphe obu; kele o to nodu Chileke l'eka eme iphe, oome. Kele iphemiphe, nemadzu eme; ebe o nodu Chileke l'eka eme iya bukwa ya eme iphe-eji.

Etso eka Jizosu Kereshi

15 ¹Anyibe ndu shihuru ike; l'a-noduje ata nshi l'iphe, ndu eshi-huduru ike eme. G'anyi te emejeekwapho ehu anyi ehu anyi. ²Onyenonu g'anyi ha meje iphe, a-tso nwibe iya utso; lo buru iphe, eegude kutsee ya. Oo ya bu; g'obu akabakwanaa ya eshihu ike l'iphe, ke Chileke. ³Le Kereshi ta abukwa ehu iya ehu iya be o shi emeje. Iphe, meru nu buepho iphe ono, e deru su: "Iphe, bukpo ejo-opfu, ndu epfuru ngu ejo-opfu pfuru ngu bu mbedua vutaru onwu iya." ⁴L'iphemiphe, e dekotaru teke ndiche be e dekwaru g'o zia anyi iphe. Oduje anyi obu g'anyi aduje ike taa nshi nodu ele enya iphe, Chileke kweru anyi ukwe iya. ⁵Ge Chileke ono, bu iya emeje g'anyi taju iphe nshi; bya aduje anyi obu ono mee g'unu gude etso eka Kereshi Jizosu g'obu buru unu nanu. ⁶Oo ya bu; g'unu atuko g'unu ha tugba; gude obu lanu; gudekwapho olu lanu aja Chileke ajaja; mbu Chileke, bu iya bu Nna ke Nnajiuphu anyi, bu Jizosu Kereshi.

Ozi-oma bu ke ndiphe mgburugburu

⁷Oo ya bu; unu gudeje obu unu haa g'unu le nwibe unu tugba; ge Kereshi hakwarupho; unu l'iya tugba; noo ya bu g'aa-jakwanaa Chileke ajaja. ⁸L'iphe, mu epfu bu le Kereshi byaru bya aburu onye-ozu ndu buru ubvu; g'o mee g'iphe ono, Chileke kweru ndiche anyi phe ukwe iya pho vukota. Oo ya bu; g'oo-shi nno goshi le Chileke bu onye ire-lanu, emeje iphe, o pfuru. ⁹Wafua ge ndu abudu ndu Jiu ajaa Chileke ajaja lo phunukaru phe obu-imemini, bu iya bu iphe, e deru su: "Oo ya meru g'o gude mu je letu ngu epha l'echilabo ndu abudu ndu Jiu. Mu e-gude epha ngu gua ebvu jaa ngu ajaja." ¹⁰Tem e dekwaapho su: "Unube ndu abudu ndu Jiu; unu le ndu Chileke hotaru toko tee eswa!" ¹¹Ozo buru: "Unu tua Chileke epha; unube ndu abudu ndu Jiu g'unu ha. Ndiphe mgburugburu; unu tua ya epha!" ¹²Tem Azaya byakwapho bya epfua su: "Oshilokpa Jiesi l'abya! Oo ya e-tsefuta bya aburu eze k'iphe, bu ndu bu ndu abudu ndu Jiu. O buru iya bu onye epe a-nodu ele enya iya." ¹³Ge Chileke, onye bu iya emeje g'anyi lee enya iphe, o kweru ukwe iya; mee g'ehu-utso unu dzua oke; loomekwapho g'ehu debe unu guu g'unu ha; kele unu kweru nkiya. Oo ya bu; g'unu egude ike ke Unme-du-Nso kabakpo ele enya iphe ono, Chileke kweru ukwe iya ono.

**Iphe, kpatarū Pōlu ede
ekwo-ozī-a egube-a**

¹⁴Unwunna mu; unubēdua bē mu maakwaru majia ɛnya; l'iphe, unu maru buɛpho eme iphe, dū ree; l'unu maru iphe, bu uche Chileke ɔkpobe amaru; k'ɔphu unu sūru g'unu a-nɔdu akpɔ-ziru nwibe unu ɔzo. ¹⁵Ōle g'ɔ dūhabe; o nwekwarupho nwiphe, mu eme gē mu harū nyatacharū unu; ɔ buru iya meru g'ɔ gude mu harū pfua iphe ono pfushia ya ike; mbū ɔphu mu atsūdu ebvu; kēle Chileke mewaru mu eze-iphe-oma. ¹⁶O mewaru mu; mu buru onye-ozī Kéreshi Jizosū; gē mu je ezia ndu abūdu ndu Jiu ozī; mu eje ozī, gbaru onye uke Chileke l'ezī ozī-oma ono, shi l'ēka Chileke onoya. Ōo ya bu gē Chileke anatakwanu ngweja ndu abūdu ndu Jiu. L'ɔ buru iphe, Unme-dū-Nsɔ e-me g'ɔ buru iphe, e doberu Chileke iche. ¹⁷Ōo ya bu lē mu a-nɔdu etukpɔ onwomu ɛpha ozī, mu ejeru Chileke; eshinu mu lē Kéreshi tūgbawaru buru nanū. ¹⁸Ō tɔ dukwa iphe, mu atū ama epfupfu, abūdu iphe ono, Kéreshi gbē mu l'ēka mee ono, bu iya bu l'o meru gē ndu abūdu ndu Jiu kweta bya abūru ndu emeje iphe, Chileke pfuru. Iphe ono bē Kéreshi gude opfu ɔnu mu; mē iphe, mu eme ememe; mee ɔ dū egube ono. ¹⁹O gudekwaphɔ ike k'eme ɔhumalenya, dūgbaa biribiri; mē ike kē Unme-dū-Nsɔ gude mee ya. Ōo ya bu; e shi egube ono mu nɔdu asajē ozī-oma kē Kéreshi ono g'ɔ gbaru l'ekameka; e -shi lē Jierúsalemū jasū mu rwua Ilirikumu. ²⁰Ō buerupho iphe lanū, anɔduje evu mu evuvu l'obu bu eje epfu opfu Chileke; ɔle ɔ tɔ bukwa gē mu je iya epfupfu l'ēka a mahawarū kē Kéreshi; gē mu ta agbē gbēshi je akpūahaa ɔlo l'eli ɔkpa ɔlo, onye ɔzo tūhawaru. ²¹Ō dūa g'iphe, e deru l'ekwo-opfu Chileke sū:

“Ndu e teke pfusweeru nkiya
l'a-hūma l'ɛnya.

Ndu e teke anūma-swee nkiya bē kē nkiya ono e-do ɛnya.”

Pōlu e-je g'ɛphe lē ndu Romu kwee

²²Ōo iphe ono meru g'ɔ gude o nweru iphe, kpɔshichawaru mu ugbo olemole gē mu ta abya agbaphee unu. ²³Obenu lē nta-a bē eshinu mu jeɛbewaru iphe, gbaru mu l'ejeje l'uswe iya ɔwa; tēme mu nɔwaa apha olemole, mu shi meta gē mu e-me gē mu bya gē mu l'unu kwee; ²⁴bē mu arīkwa lē mu e-megha iya nta. Mu arī lē mu a-bata mē mu -jejeepho Supenu. Mu l'unu kpɔchaa nwupfu nwanshīi g'obu shihu mu ike; unu eduwa mu rɔ ije; gē mu jeshia ɛka ono. ²⁵Ō -buru kē nta-a bukwa ndu kē Chileke nɔ lē Jierúsalemū bē mu gude iphe ewojeru g'ɛphe mee ɛka atsū phē l'ehu. ²⁶Lē ndu kē Kéreshi lē Masedoniya; mē ndu kē Akaya bē chiru idzu; tūa iphe g'a nū ndu-nsɔ lē Jierúsalemū; ndu ɔphu adūdu g'ɔ dū phē. ²⁷ɛphe tūkpooru obu phē onyo nū iphe ono. Tēme e -jejekpɔo ya epfupfu

bẹ unu maru l'ọ dūwaa g'ugwo; ẹphe jiru iya ndu kẹ Chileke lẹ Jierúsa-
lẹmu; lẹ teke ọ bụ lẹ ndu abụdu ndu Jiu bẹ ẹphe lẹ ndu ọpflu bụ ndu Jiu
gba mgba l'iphe-oma, shi Unme-dụ-Nsọ ono, Kéreshi meru nū ndu Jiu
onoya l'ẹka; ọo ya bụ l'ọ gbaru g'ẹphe gudeje ẹku ọpflu ẹphe kpatarụ gude
yeru ndu Jiu ono ẹka. ²⁸ Teke mu jechaerupho ozi onoya; nūchae pẹ phọ
okpoga ono, a tūtaru onoya l'ọo-buru mu eje Supenu; mu e-shiwarọ bata
teke onoya. ²⁹ Ọpflu mu maru bụ lẹ teke mu byaru bẹ mu e-me g'iphe-
oma, shi Kéreshi l'ẹka dzua unu oke l'ẹka.

³⁰ Unwunna mu; mu arwo unu sụ g'unu gude k'iswi ẹhu Nnajiuphu
anyi, bụ Jizọsu Kéreshi waa k'eye obu ọpflu shi Unme-dụ-Nsọ l'ẹka lwu-
bude mu ọgu ono. Unu pfuje opfu ẹhu mu nū Chileke. ³¹ Gẹ Chileke te
ekwekwa gẹ ndu jikaru ozi-oma ono l'alị Jiudiya fūaru mu l'uzo; yefua
g'iphe, mu gude eje dūkwapho ndu-nsọ lẹ Jierúsalemu ree anata. ³² Ọo ya
bụ; ọ -buru uche Chileke; mu egude ẹhu-utso byapfuta unu g'anyi l'unu
nọta; k'ọpflu ọo-būwaruro mu l'unu atūta unme. ³³ Gẹ Chileke ono, emeje
gẹ nchị dū doo ono swikwaru unu eswiru g'unu ha. Nokwa g'ọ dū.

Polu ekelegbaa ndu ọ maru l'ẹhu l'ẹhu

16 ¹ Mu eme g'unu maru nwanna anyi nwanyi, bụ Fibi; onye lejeru
Chịochi, nọ lẹ Kenkiriya ozi. ² Unu gude iswi ẹhu Nnajiuphu anyi
nata iya ọkpobe anata g'ọ gbaru ndu-nsọ l'ememe; unu eyejeru iya ẹka
l'iphe, bụkpoo iphe, mkpa iya dūru iya l'echilabọ unu; l'ọ yekpọakwaru
ikpoto nemadzu ẹka; mękpoo mbedua l'ishi onwomu.

³ Unu keleru mu Pirisila yee Akwila; ndu anyi l'ẹphe tūkoru ejeru Ké-
reshi Jizọsu ozi; ⁴ ndu gude iswi ẹhu mu l'ọo ishi pẹ alọlo. Ọ tọ bulekwa
mu-a l'ekele pẹ nwekinyi mu k'iphe, ẹphe meru mu. Iphe, bụkotakpoo
Chịochi, nọ l'alị ndu abụdu ndu Jiu mgburugburu l'ekelekwa pẹ phọ.
⁵ Nokwaphọ g'unu e-keleru mu Chọochi ono, edzukoje l'ibe pẹ ono.

Unu kelekwaru mu phọ Epenitọsu; ọkpobe ọnyà mu, mu yeru obu. Ọo
ya bụ onye vuchakpoo ọzo woru onwiya ye Kéreshi l'ẹka lẹ Eshiya. ⁶ Unu
kelekwaru mu phọ Meri; onye jeru anyi ozi jeshia ya ike. ⁷ Unu ekele-
kwaphọ Andurōnikosu yee Jiuniyasu; ndu mu l'ẹphe bụ ndu Jiu lanụ bya
aburu ndu mu l'ẹphe shi tūko nọdu mkpọro. Ẹphe bụ ndu kwatakpoo ru
duru onyemonye lẹ nsọ mę a -bya l'ẹka ndu-ishi-ozi nọ; tẹme ẹphe vuru
mu ọzo buru ndu kẹ Kéreshi.

⁸ Unu kelekwaphọ Ampuliyatọsu; onye mu yeru obu l'ime Nnajiuphu.
⁹ Unu ekelekwaphọ Ubanọsu; onye anyi l'iya tūkoru ejeru Kéreshi ozi;
mękwapho onye ono, mu yeru obu ono, bụ Sutakis. ¹⁰ Unu kelekwaphọ
Apelisu; onye gudewaa umere iya goshi lẹ ya pfu-shiru ike l'ekwekwe, o
kweru kẹ Kéreshi. Unu ekelekwaphọ ndibe Arisutobulosu. ¹¹ Unu kele-
kwaphọ Herodiyonu onye mu l'iya tūkoru buru abubu. Unu ekelekwaphọ
ndu bu l'ibe Nasisosu; ndu nọwaa Nnajiuphu l'ẹka.

¹² Unu kelekwapḥo Tirayifina yee Tirayifosa ndu ejeru Kéreshi ozi ejeshikpoo ya ike. Unu ekelekwapḥo onye mu yeru obu, bu Pesisu; onye jewaru Kéreshi ozi jeshikwaa ya pḥo ike. ¹³ Unu kele Rufosu onye ono, gbaru iche l'ejeshi ozi ke Nnajiuphu ike ono. Unu ekele ne iya; onye duhukwapḥo g'o buwaa ne nkemu. ¹⁴ Unu kelekwaru mu pḥo Asinkiritosu; waa Fulegonu; waa Hemisu; waa Paturobasu; waa Hemasu; mekpowaro unwunna ozo, ephe l'ephe tukoru nodu l'eka ono. ¹⁵ Unu kele Filologosu; waa Jiuliya; waa Niriyosu; waa nwune iya ke nwanji; waa Olimpasu; mekpowaro iphe, bukotakpoo ndu-nso, ephe l'ephe no l'eka ono.

¹⁶ Unu kelekwa nwibe unu ekele; nmata phe akpa, du nso. Ndu ke Kéreshi, no l'iphe, bukota Chiochi l'ophu ekelekwotakwapḥo unu ekele.

Iphe, unu e-meje

¹⁷ Unwunna mu; mu arwokwa unu arworwo su g'unu letakwa enya m'obvu ndu ono, anoduje eme g'ekwo du onoya; ndu egudeje egube ono agbaghashi iphe, Chiochi kwetarū l'o bu okpobe-opfu. Iphe, ephe anoduje eme be yee iphe ono, e ziru unu ono ta adagbajedu. Unu kpakwaru phe l'aphara. ¹⁸ Kele ndu eme udu iphe ono ta abukwa Nnajiuphu anyi, bu Kéreshi be ephe ejeru ozi; o kwa iphe, ekpiri iya du phe be ephe eje ozi iya. Ephe eteje manū l'opfu; gude ire mecha mecha edepushi ndu enwezidu egomunggo. ¹⁹ Ole onyemonye tukoru maru g'unu emeberu iphe, ozi-oma ono pfuru. O buru iphe ono meru g'o gude ehu nodu anoduje atso mu utso. Ole o du mu g'a su g'unu gudeje mmamiphe majeru iphe, bu iphe, du ree; sefuje eka l'iphe, adudu ree. ²⁰ Chileke onye bu iya be nchi-adudoo shi l'eka taa noekwa odu g'o to mee g'unu zopyashia Nsetanu l'okpa. Ge Nnajiuphu anyi, bu Jizosu Kéreshi mekwaaru unu eze-iphe-oma.

²¹ Timoti, mu l'iya tukoru eje ozi-a; lekelekwapḥo unu. Lusiyosu; waa Jiasonu; me Sosipeta phe; ndu anyi l'ephe tukoru buru abubu lekelekwaro unu.

²² Mbēdua, bu Teshiyosu, l'ede ekwo-ozia; bya aburu onye unu l'iya tugbaru nanu l'ime Nnajiuphu lekelekwapḥo unu ekele.

²³ Gayosu-a, mu bu l'ibe iya-a; teme o buru l'ibe iya be Chiochi l'ophu edzukoje-a; lekelekwapḥo unu-o! Nokwapḥo ge Erasutosu; mbu onye owa-a, bu iya edobejeru oha okpoga phe-a; lekelekwapḥo unu yee nwanja anyi, bu Kwotosu.

²⁴ Ge Nnajiuphu anyi, bu Jizosu Kéreshi meeru unu g'unu hakota eze-iphe-oma. Nokwa g'o du.

Aja Chileke ajaja, Polu gude kpō-chia ozi ishi

²⁵ G'anyi jaa Chileke ajaja; l'oo ya l'a-du ike mee g'unu pfuru pfushia ike lekwekwe, unu kweru nkiya. O buru ozi-oma ono, mu ezi ono be

oogudeje eme g'unu pfushia ike ono; mbu ozi-oma ono, l'epfu ke Jizosu Kereshi onoya; bya egoshikwapho iphe ono, e shi domia edomi ono, a phuru l'ophulanya eshi l'edenwede ono. ²⁶ O buru iphe ono be o gbẹ nta-a bya emee g'a maru. Nta-a be okpobe-opfu ono shiwaa l'iphe, ndu mpfuchiru Chileke deru bahu g'ite; a numa-dzuru iya. Nta-a be Chileke ono adudu teke aa-su l'o shi; ophu o dudu teke aa-su l'o noo teke onono-beru ono; ziru e woru okpobe-opfu ono mee; ohamoha mgburugburu madzuru iya; k'ophu ee-kwetadzuru meje iphe, o suru g'e mee. ²⁷ G'e shi Jizosu Kereshi l'eka jaa Chileke ajaja; mbu onye lanu ono, bu yebedua nwekiya bu Chileke; teme o buru iya nwekiniya iya nwe ke mmamiphe. G'a jaa ya jasu le tuutuutu le mijimiimii. Nokwa g'o du.